

唐  
文  
粹

四



重校正唐文粹卷第十六下

吳興姚

鉉

纂

詩癸 摠四十四首

古調歌篇六

幽居十二

百丈谿讀書閻防家叔徵君東谿草堂二首盧象

寒食陸渾別業宋之問

題東谿公幽居李白

宿裴有書齋李觀訓暉上人夏日林泉見贈陳子昂

贈宣州元處士杜牧東溪翫月王昌齡

太白東谿張老舍即事寄舍弟姪等岑參

長安秋夕戎昱貽池陽谷口元替善李端

山居十三

宿裴氏山莊王昌齡山中作沈千運入山寄城中故人王維

獨遊王昌齡過張邯鄲莊姚合宿王昌齡隱居常建

訪陸羽處士

釋皎然

初春

王績

南充謝郡客留贈宇文中丞

暢當

村居

沈亞之

贈劉藍田

王維

退居

孟郊

渭川田家

王維

傷嘆十九

秦中吟十首

白居易

憫農

李紳

石壕吏

杜甫

辛苦吟

于濶

田家詞

元稹

傷田家

聶夷中

採玉行

韋應物

茶山作

素高

野老歌

張籍

野行

姚合

百丈谿新理茅茨讀書

閻防

浪迹棄人世還山自幽獨始傍巢由蹤吾其獲心曲荒庭何所有  
老樹半空腹秋蛸鳴北林暮鳥穿我屋栖遲樂遵渚恬曠寡所欲  
開卦推盈虛散帙攻節目養閑度人事逢命知止足不學東國儒  
俟時勞伐輻

家叔徵君東谿草堂二首

盧象

關山十餘里青壁森相倚欲識堯時天東谿白雲是雷聲轉幽室  
雲氣香流水澗影生蟲蛇巖端翳杞梓大道終不易君恩曷能已  
鶴羨無老時龜言攝生理浮年笑六甲元化潛一指未暇掃雲梯  
空慙阮家子

今朝共遊者得性閑未歸已到仙人家莫驚鷗鳥飛水深巖公釣  
松挂巢父衣雲氣轉幽寂谿流無是非名理未足羨腥臊詎所稀  
自惟負貞意何歲當食薇

寒食陸渾別業

宋之問

洛陽城裏花如雪陸渾山中今始發旦別河橋楊柳風夕卧伊川  
桃李月伊川桃李正芳新寒食山中酒復春野老不知堯舜力酣  
歌一曲太平人

題東谿公幽居

李白

杜陵賢人清且廉東谿卜築歲將淹宅近青山同謝眺門垂碧柳  
似陶潛好鳥迎春歌後院飛花送酒舞前簷客到但知留一醉盤

中只有水精鹽

宿裴有書齋

李觀

卧君山窻下山鳥與我言清風何颺颺松柏中夜繁  
夕遊夫歸趣宿此似故園林煙橫近郊谿月落古原  
稚子不待曉花間出柴門

訓暉上人夏日林泉見贈

陳子昂

聞道白雲居窈窕青蓮宇巖前萬丈流樹石千年古  
林卧對軒窻山陰滿庭戶方釋塵中事從君襲蘭杜

贈宣州元處士

杜牧

陵陽北郭隱身世兩忘者蓬蒿三畝居寬於一天下  
鐫酒對不酌默與玄相話人生自不足愛嘆遭逢寡

東谿玩月

王昌齡

月從斷山口遙吐柴門端萬木紛空霽流陰中夜攢  
光連虛象白氣與風露寒谷靜秋泉響巖深青靄殘  
澄清入幽夢影破抱空巒

恍忽琴窻裏松谿曉思難

太白東谿張老舍即事寄弟姪等 岑參

渭上秋雨過北風暮騷騷天晴諸山出太白峯最高主人東谿老  
兩耳生長毫遠近知百歲子孫皆二毛中庭井欄上一架獼猴桃  
石泉飯香秔酒瓮開新糟愛茲田中趣始悟世上勞我行有勝事  
書此寄爾曹

長安秋夕

戎昱

八月更漏長愁人起常早閉門寂無事滿地生秋草昨宵西窻夢  
先入荆門道遠客歸去來在家貧亦好

貽池陽谷口元贊善

李端

入谷逢君來秋泉已難涉林間人獨坐月下山相接重露濕蒼苔  
明燈照黃葉故交一不見素髮何稠疊

宿裴氏山莊

王昌齡

蒼蒼竹林暮吾亦知所投靜坐山齋月清谿聞遠流西峯下微雨  
向晚白雲收遂解塵中組終南春可遊

山中作

沈千運

棲隱別無事所願早離塵不辭城邑遊禮樂拘束人邇來歸山林  
庶事皆吾身何者爲形骸誰是智與仁寂寞了閑事然後知天真  
咳唾驚榮華迂俯相屈伸如何巢與由天子不得臣

入山寄城中故人

王維

中歲頗好道晚家南山垂興來每獨往勝事空自知行到水窮處  
坐看雲起時偶然值林叟談笑無迴期

獨遊

王昌齡

林卧情每閑獨遊景常晏時從灞陵下垂釣往南澗手攜雙白魚  
目送千里鴈悟彼飛有適知此罹憂患放之清冷泉因得省踈慢  
永惟青岑客迴首白雲間神超物無違豈繫名與宦

過張邯鄲莊

姚合

客行長似病煩熱攻四肢到君讀書堂忽若逢良醫堂前水交流  
堂下樹交枝雨門延風涼洗我昏濁肌與子還往熟行坐恣所宜

時時相獻酬文字當酒卮野飯且藜藿永日亦不飢苟餐非其所  
繪炙爲蒺藜時清士人閑耕者唯文詞豈獨鄉里薦當取四海知

宿王昌齡隱居

常建

青溪深不測隱處唯孤雲松際露微月清光猶爲君茅亭宿花鳥  
藥院滋苔紋余亦謝時去西山鸞鶴羣

訪陸羽處士

釋皎然

太湖東西路吳王古山前所思不可見歸鴈自翩翩何山賞春茗  
何處弄清泉莫是滄浪子悠悠一釣船

初春

王績

前旦出園遊林華都未有今朝下堂望池冰開已久雪避南軒梅  
風催北庭柳遙呼竈前妾却報機中婦年光恰恰來滿甕營春酒

南充謝郡客遊澧州留贈字文中丞 暢當

僕本濩落人辱當州郡使量力頗及早謝歸今即已蕭蕭若凌虛  
衿帶頓銷靡車服率然來涪陽作遊子鬱鬱寡開顏默默獨行李



忽逢平生友一笑方在此秋情寧風日楚思浩雲水爲語弋林者  
冥冥鴻遠矣

村居

沈亞之

無樹巢宿鳥無酒共客醉月上蟬韻殘梧桐陰繞地獨出村舍門  
吟劇微風起蕭蕭蘆荻叢叫嘯如山鬼應綠我憔悴爲我哭秋思

贈劉藍田

王維

籬間犬迎吠出屋候荆扉歲晏輸井稅山村人夜歸晚田始家熟  
餘布成我衣詎肯無公事煩君問是非

退居

孟郊

退身何食可敗力不得閑種稻耕白水負薪斫青山衆聽喜巴唱  
獨醒愁楚顏日暮靜歸時幽幽叩松關

渭川田家

王維

斜光照墟落深巷牛羊歸野老念牧童倚杖候荆扉雉雊麥苗秀  
蠶眠桑葉稀田夫荷鋤至相見語依依羨此良閑逸悵然歌式微

秦中吟十首并序

白居易

貞元元和之際予在長安聞見之間有足悲者因直歌其事命爲秦中吟

議婚

天下無正聲悅耳即爲娛人間無正色悅目即爲姝聲色非相遠貧富則有殊貧爲時所棄富爲時所趨紅樓富家女金縷繡羅襦見人不斂手嬌癡二八初母兄未開口已嫁不須更綠窻貧家女寂寞二十餘荆釵不直錢衣上無真珠幾回人欲娉臨日又踟躕主人會良媒置酒滿玉壺四座且勿飲聽我歌兩途富家女易嫁嫁早輕其夫貧家女難嫁嫁晚孝於姑聞君欲娶婦娶婦意何如

重賦

厚地植桑麻所要濟生民生民理布帛所求活一身身外充征賦上以奉君親國家定兩稅本意在憂人厥初防其淫明勅內外臣稅外加一物皆以枉法論奈何歲月久貪吏得因循役我以求寵

斂索無冬春織絹未成足縑絲未盈斤里胥迫我納不許暫逡巡  
歲暮天地閉陰風生破村夜深煙火滅霰雪落紛紛幼者形不蔽  
老者體無溫悲喘與寒氣併入鼻頭辛昨日輸殘稅因窺官庫門  
繒帛如山積絲絮似雲屯号爲羨餘物隨日獻至尊奪我身上暖  
買爾眼前恩進入瓊林庫歲久化爲塵

傷宅

誰家起甲第朱門大道邊豐屋中櫛比高墉外迴環纍纍六七堂  
棟宇相勾連一堂費百萬鬱鬱起青煙洞房溫且清寒暑不能干  
高堂虛且迥坐卧見南山繞廊紫藤架夾砌紅藥欄攀枝摘櫻桃  
帶花移牡丹主人此中坐十載爲大官厨有臭敗肉庫有朽貫錢  
誰能將我語問爾骨肉間豈無貧賤者忍不救飢寒如何奉一身  
直欲保千年不見馬家宅今作奉誠園

傷友

陋巷孤寒士出門苦栖栖雖云志氣在豈免顏色低平生同門友

通籍在金闈曩昔膠漆契爾來雲雨睽正逢下朝歸軒騎五門西  
是時天久陰三日雨淒淒寒驢避路立肥馬當風嘶迴頭忘相識  
占道上沙堤昔年洛陽社貧賤相提攜今日長安道對面隔雲泥  
近日多如此非君獨慘悽死生不變者唯聞任與黎

任公達  
黎達

不致仕

七十而致仕禮法有明文何乃貪榮者斯言如下聞可憐八九十  
齒墮雙眸昏朝露貪名利夕陽憂子孫挂冠顧翠綾懸車惜朱輪  
金章腰不勝僂偻入公門誰不愛富貴誰不戀君恩年高須告老  
名遂合退身少時共嗤誚晚歲多因循賢哉漢二疎彼獨是何人  
寂寞東門路無人繼去塵

立碑

勲德既下衰文章亦陵夷但見山中石刻作路傍碑銘勲悉太公  
叙德皆仲尼復以多爲貴千言直萬言爲文彼何人想見下筆時  
但欲愚者悅不思賢者嗤豈獨賢者嗤仍傳後代疑古石蒼苔字

安知是愧辭我聞望江縣麴令撫悼葵饑名在官有仁政名不聞京師身歿欲歸葬百姓遮路岐攀轅不得去留葬此江湄至今道其名男女涕皆垂無人立碑碣唯有邑人知

輕肥

意氣驕滿路鞍馬光照塵借問何爲者人稱是內臣朱紱皆大夫紫綬或將軍誇赴軍中晏走馬去如雲罇罍溢九醞水陸羅八珍果擘洞庭橘鱠切天池鱗食飽色自若酒酣氣益振是歲江南旱衢州人食人

五弦

清歌且罷唱紅袂亦停舞趙叟抱五弦宛轉當曾撫大聲粗齷若散颯颯風和雨小聲細欲絕切切鬼神語又如鵲報喜轉作啼猿苦十指無定音顛倒宮徵羽坐客聞此聲形神若無主行客聞此聲駐足不能舉嗟嗟俗人耳好今不好古所以北窻琴日日生塵土

歌舞

秦城歲云暮大雪滿皇州雪中朝退者朱紫盡公侯貴有風雲興  
富無飢寒憂所營唯第宅所務在追遊朱輪車馬客紅燭歌舞樓  
懽酣促密坐醉暖脫重裘秋官爲主人廷尉居上頭日中一爲樂  
夜半不能休豈知闕鄉獄中有凍死囚

買花

帝城春欲暮誼誼車馬度共道牡丹時相隨買花去貴賤無常價  
酬直看花數灼灼十朶紅交交五束素上張幙屋庇旁織笆籬護  
水灑復泥封移來色如故家家習爲俗人人迷不悟有一田舍翁  
偶來買花處低頭獨長嘆此嘆無人諭一叢深色花十戶中人賦

憫農二首

李紳

春種一粒粟秋收萬顆子四海無閒田農夫猶餓死  
鋤禾日當午汗滴禾下土誰知盤中飧粒粒皆辛苦

石壕吏

杜甫

莫投石壕村有吏夜捉人老翁踰墻走老婦出門看吏呼一何怒  
婦啼一何苦聽婦前致詞三男鄴城戍一男附書至二男新戰死  
在者且偷生死者長已矣室中更無人所有乳下孫有孫母未去  
出更無完裙老嫗力雖衰請從吏夜歸急應河陽役猶得備晨炊  
夜久語聲絕如聞泣幽咽天明登前途獨與老翁別

辛苦吟

于漬

壠上扶犁兒手種腹長飢窓下擲梭女手織身無衣我願燕趙妹  
化爲嫫母姿一笑不直錢自然家國肥

田家詞

元楨

牛吒吒駢角田确确旱塊敲牛啼跣跣種得官倉珠顆穀六十  
年來兵簇簇月月倉糧車轆轤一日官軍收海服驅牛駕車食牛  
肉歸來收得牛兩角重鑄銀犁作斤斲姑春婦擔輸促促輸官不  
足歸賣屋農死有兒牛有犢不遣官軍糧不足

傷田家

聶夷中

二月賣新絲五月糶秋穀醫得眼前瘡剗却心頭肉我願君王心  
化作光明燭不照綺羅筵偏照逃亡屋

采玉行

韋應物

官府徵白丁言采藍溪玉絕嶺夜無人深榛雨中宿獨婦餉糧還  
哀哀舍南哭

茶山作

袁高

禹貢通遠俗所圖在安人后王失其本職吏不敢陳亦有姦佞者  
因茲欲求伸動生千金費日使萬姓貧我來顧渚源得與茶事親  
吐輟耕農米採採實苦辛一夫且當役盡室皆同臻捫葛上歌壁  
蓬頭入荒榛終朝不盈掬手足皆皴鱗悲嗟遍空山草木爲不春  
陰嶺芽未吐使者牒已頻心爭造化力先走挺塵均選納無晝夜  
擣聲昏繼晨衆工何枯槁俯視彌傷神皇帝尚巡狩東郊路多堙  
周迴遶天涯所獻逾艱勤況減兵革困量茲固疲民未知供俸餘  
誰合分此珍顧省忝邦守又慙復因循茫茫滄海間丹憤何由申



野老歌

張籍

老翁家貧在山住耕種山田三四畝苗踈稅多不得食輸入官倉  
化爲土歲暮鋤犁傍空室呼兒登山收橡食西江賈客珠百斛船  
中養犬長食肉

野行

姚合

客行野田間比屋皆閉戶借問屋中人盡去作商賈官家不稅商  
稅農服作苦居人競東西道路侵墮畝採玉上山巔探珠入水府  
邊兵索衣食此物同泥土古來一人耕三人食猶飢如今千萬家  
無一把鋤犁我倉常空虛我田生蒺藜上天不雨粟何由活蒸黎

重校正唐文粹卷第十六下

重校正唐文粹卷第十七上

吳興姚

鉉

纂

詩十一摠五十九首

古調歌篇七

寺觀十一

始除尚書郎別善福精舍

常應物

寄閩防劉春虛

題鶴林寺

薛瓊

題破山寺後禪院

常建

琅邪山寺

常應物

簡寂觀西澗瀑布作

五老峯贈隱者

姚

石門墨山有禪堂道觀天下絕境

張說

題思禪寺

獨孤及

仙遊寺有龍潭穴弄玉祠

李華

遊棲霞寺

顧況

廟杜四

四皓廟

元稹

魚山神女歌詞二首

王維

古杜

元稹

邊塞三

虜患 張陸

代北州老翁答 張謂 遼西 崔顥

畫圖六

王處士草堂壁畫 衡霍諸山 劉長卿 題劉相公三湘圖 元士

觀于舍人壁畫山水 王季友 題遐上人古松歌 朱

畫竹歌 白居易 觀李湊所畫美人障子 劉長卿

古器物五

石鼓歌 韓愈 古劍歌 郭元振 磨鏡篇 劉禹錫

贈友人古鏡 朱書 團扇歌 劉禹錫

樂器七

彈琴 劉希載 江上琴興 常建 聽蜀僧彈琴 李白

奉和張舍人閣中直夜思聞雅琴因書事 呂溫

聽彈風入松贈楊補闕 王昌齡 金陵聽韓侍御吹笛 李白

武昌老人說笛歌 劉禹錫

草木十一

題老張松樹宋之問

古栢行杜甫

脩竹篇陳子昂

種竹元稹

竹徑偶作權德輿

露青竹鞭歌顧況

暑日題道邊樹王

井上桐陸龜蒙

石上藤岑參

兔絲元稹

春草謠顧況

禽鳥昆虫十

王兵馬使二角鷹杜甫

觀放白鷹李白

飛鳶操劉禹錫

百舌吟

鸚鵡詞蘇郁

鴛鴦篇陳子昂

子規啼韋應物

鷓鴣吟劉禹錫

春蟬元稹

江上蚊子韋楚老

道路二

戲題關門岑參

門前路陸龜蒙

始除尚書郎別善福精舍

韋應物

簡略非世器委身同草木逍遙精舍居飲水自為足累日曾一櫛

對書常懶讀社臘會高年山川恣遊曠明世方選士中朝懸美祿  
除書忽到門冠帶便拘束愧忝郎署迹謬蒙君子錄俯仰垂華纓  
飄飄翔輕轂行將親愛別戀此西澗曲遠峯照夕川夏雨生衆綠  
迅風飄往路迴首不遑宿明晨下煙闕白雲在幽谷

寄閻防

時在終南山豐德寺讀書

劉昫虛

青暝南山色君與緇錫隣深路入古寺落花隨暮春紛紛對寂寞  
徃徃落衣巾松色空照水經聲時有人晚心復南望山遠情獨親  
應以脩徃業亦唯此立身深林度空夜煙月資清真莫嘆文明日  
彌年從隱淪

題鶴林寺

薛據

道門隱形勝向背臨法橋松覆山殿冷花藏溪路遙珊珊寶幡挂  
燄燄明燈燒遲日半空谷春風連上潮少憑水木興暫忝身心調  
願謝携手客茲山禪侶饒

題破山寺後禪院

常建

清晨入古寺初日明高林竹徑通幽處禪房花木深山光悅鳥性  
潭影空人心萬籟此都寂但餘鍾磬音

琅邪山寺

常應物

受命恤人隱茲遊久未忘鳴騶響幽澗前旌耀崇崗青冥臺砌寒  
綠縹草木香填壑隣花界疊石構雲房經制隨巖轉繚繞豈定方  
新泉洩陰壁高蘿蔭綠塘攀林一棲心飲水得清涼還歸坐郡閣  
但見山蒼蒼

簡寂觀西澗瀑布下作

淙流絕壁散虛煙翠澗深巖際松風起飄飄來灑襟窺蘿玩猿鳥  
解組傲園林茶菓邀真侶觴酌洽同心曠歲懷茲賞春行始重尋  
聊將橫吹笛一寫山水音

五老峯大明觀贈隱者

姚係

雲觀此山北與君携手稀林端涉橫水洞口入斜暉乍覺鸞鶴通  
忽爲煙霧飛故人清和客默會琴心微丹術幸可授青龍當未歸

悠悠平生意此日復相違

石門墨山二山相連有禪堂道觀天下絕境 張說

茵輪江上山近在華容縣常陟巴丘首天晴遙可見佳遊屢前諾  
芳月愆幽眷及此符守移惟言臨道便既携賞心客復有送行掾  
竹徑入陰窅松崖上空舊草共林一色雲與峯萬變探窺石門斷  
緣越沙澗轉兩山勢爭雄峯巘相顧盼藥妙靈仙寶境華巖壑選  
清都西淵絕金地東敞宴池果接園畦風煙瀾臺殿高尋去石頂  
曠覽天宇徧千山紛滿目百川豁對面騎來雲氣迎人去鳥聲戀  
長揖桃源士舉世同企羨

題思禪寺上方

獨孤及

溪口聞法鼓停撓登翠屏攀雲到金界合掌開禪扃鬱律衆山抱  
空濛花雨零老僧指香樓云是不死亭眇眇千越路茫茫春草青  
遠山噴百谷繚繞馳東溟目極想何在境照心亦冥駭然諸根空  
破結如破瓶下視三界狹但聞五濁腥山中有良藥吾欲墮天形

仙遊寺有龍潭穴弄玉祠

李華

捨事入樵逕雲木深谷口萬壑移晦明千峯轉前後巖然龍潭上  
石勢若奔走開坼秋天光崩騰夏雷吼靈溪自茲去紆直互紛糾  
聽聲靜復喧望色無更有冥冥翠微下高殿映杉柳滴瀝洞穴中  
懸泉響相扣昔時秦王女羽化年代久日暮松風來簫聲生左右  
早窺神仙籙願結芝木友安得羨門方青囊繫吾肘

遊棲霞寺

顧況

棲霞山中子規鳥口邊血出啼不了山僧後夜初入定聞似不聞  
山月曉

四皓廟

元稹

巢由昔避世堯舜不得臣伊呂雖急病湯武乃可君四賢胡爲者  
千載名氛氲顯晦有遺跡前後疑不倫秦政虐天下黷武窮生民  
諸侯戰心死壯士眉亦殫張良韓孺子椎碎屬車輪遂令英雄意  
日夜思報秦先生相將去不復嬰世塵雲卷在孤岫龍潛爲小鱗



秦皇轉無道諫者鼎鑊親茅焦脫衣諫先生無一言趙高殺二世  
先生如不聞劉項取天下先生遊白雲海內八年戰先生全一身  
漢業日已定先生名亦振不得爲濟世宜哉爲隱淪如何一朝起  
屈作儲貳賓安存孝惠帝摧頽戚夫人捨大以謀細虬盤而蠖伸  
惠皇竟不嗣呂氏禍有因雖懷安劉志未若周與陳皆落子房術  
先生道何屯出處貴明白故吾今有云

魚山神女歌詞二首

王維

迎神

坎坎擊鼓魚山之下吹洞簫望極浦女巫巫進紛屢舞陳瑤席湛清  
醕風淒淒兮夜雨神之來兮不來使我心兮苦復苦

送神

紛進拜兮堂前目眷眷兮瓊筵來不語兮意不傳作暮雨兮愁空  
山悲多管思繁絃靈芝駕儼欲旋倏雲收兮雨歇山青青兮水潺  
潺

古社

元稹

古社基趾在人散社不神唯有空心樹妖狐藏魅人狐惑意顛倒  
臊腥不復聞丘墳變城郭花草仍荆榛良田千萬頃占作天荒田  
主人議芟斫怪見不敢前那言空山燒夜隨風馬奔飛聲鼓鞞震  
高焰旗幟翻逡巡荆棘盡狐兔無子孫狐死魅人醒煙消壇墀存  
繞壇舊田地給授有等倫農收村落盛社樹新團圓社公千萬歲  
永保村中民

虜患

張陵

今日漢家探使回蟻疊胡兵來未歇春風渭水不敢流揔作六軍  
心上血

代北州老翁答

張謂

負薪老翁住北州北望鄉關生客愁自言老翁有三子兩人已向  
黃沙死如今小男新長成明年聞道更徵兵定知此別必零落不  
及相隨同死生盡將田宅借鄰伍且復伶俜去鄉土在生本求多

子孫及有誰知更辛苦近傳天子尊武臣強兵直欲靜胡塵安邊  
自合有長策何必流離中國人

遼西

崔顥

燕郊芳歲晚殘雪凍邊城四月春草合遼陽春水生胡人正牧馬  
漢將日徵兵露重寶刀濕沙虛金鼓鳴寒衣著已盡春服誰與成  
寄語洛陽使爲傳邊塞情

王處士草堂壁畫衡霍諸山

劉長卿

愛此衡霍近卷簾如可攀能令堂上客見盡湘南山青翠千萬狀  
飛來方丈間歸雲無處滅去鳥何時還勝事日相對主人常獨閑  
清陰滿四壁佳氣生重關頗與宿心會看看慰愁顏

題劉相公三湘圖

郎士元

昔別醉衡霍爾來憶南州今朝乎津邸兼得瀟湘遊稍辨荆門樹  
依然芳杜洲微明三巴峽咫尺萬里流去鳥不知倦遠帆生暮愁  
泠陽指天末北渚空悠悠枕上見漁父座中常狎鷗誰言魏闕下

自有東山幽

觀于舍人壁畫山水

王季友

野人宿在人家少朝見此山謂山曉半壁仍樓嶺上雲開簾放出  
湖中鳥獨坐長松是阿誰再三招手起來遲于公大笑向予說小  
弟丹青能爾爲

題退上人院壁畫古松歌

朱灣

石上盤古根謂言天生朽安知草木性變在畫師手陰深方丈間  
真趣幽且閒木文離披勢搓捽中裂空心火燒出掃成三寸五寸  
枝便作千年萬年物莓苔濃淡意不同一半死皮藏蠹蟲風霜未  
必來到此氣色香似寒山中孤標可翫不可取能使支公道場古

畫竹歌

并序

白居易

協律郎蕭悅善畫竹舉世無倫蕭亦甚自秘重有終歲求其一竿  
一枝而不得者知予好事忽寫一十五竿惠然見投予厚其意高  
其藝無以荅貺作歌以報之凡一百八十六言歌曰

植物之中竹難寫古今雖畫無似者蕭郎下筆獨逼真丹青已來  
唯一人人畫竹身肥擁腫蕭畫莖瘦節節竦人畫竹梢死羸垂蕭  
畫枝活葉葉動不根而生從意生不筍而成由筆成野塘水邊碕  
岸側森森兩叢十五莖嬋娟不失筠粉態蕭素盡得風煙情舉頭  
忽見不似畫低眉靜聽疑有聲西叢七莖勁而健省向天空寺前  
石上見東叢八莖疎且寒憶曾相妃廟裏雨中看幽姿遠思少人  
別與君相顧空長嘆蕭郎蕭郎老可惜手戰眼昏頭雪色自言便  
是絕筆時從今此竹尤難得

觀李湊畫美人障子

劉長卿

愛爾含天姿丹青有殊智無間已得象象外更生意西子不可見  
千秋無重還空憐浣紗態猶在含毫間一笑豈易得雙蛾如有情  
認風不舉袖但覺羅衣輕華堂翠幕春風來內閣金屏曙色開此  
中一見亂人目只疑行到雲陽臺

石鼓歌

韓愈

張生手持石鼓文勸我試作石鼓歌少陵無人謫仙死才薄將柰  
石鼓何周網陵遲四海沸宣王憤起揮天戈大開明堂受朝賀諸  
侯劍珮鳴相磨蒐于岐陽騁雄俊萬里禽獸皆遮羅鐫功勒成告  
萬世鑿石作鼓隳嵯峨從臣才藝咸第一揀選撰刻留山阿雨淋  
日炙野火燎鬼物守護煩撝訶公從何處得紙本毫髮盡備無差  
訛詞嚴義密讀難曉字體不類隸與蝌年深豈免有畫缺快劔斫  
斷生蛟鬣鸞翔鳳翥衆仙下珊瑚碧樹交枝柯金繩鐵索鎖紐壯  
古鼎躍水騰龍梭陋儒編詩不收入二雅褊迫無委蛇孔子西行  
不到秦倚撫星宿遺羲娥嗟予好古生苦晚對此涕淚雙滂沱憶  
昔初蒙博士徵其年始改稱元和故人從軍在右輔爲我量度掘  
臼科濯冠沐浴告祭酒如此至寶存豈多氈包席裏可立致十鼓  
只載數駱馳薦諸太廟比部鼎光價豈止百倍過聖恩若許留太  
學諸生講解得切磋觀經鴻都尚填咽坐見舉國來奔波劍苔剔  
蘚露節角安置妥帖平不頗大厦深簷與蓋覆經歷久遠期無他

中朝大官老於事，詎肯感激徒。始嬰牧童敲火牛，礪角誰復著手。  
爲摩挲日消月爍，就埋沒六年西顧。空吟哦羲之俗書，趁姿媚數  
紙。尚可博白鵝，繼周八代爭戰。罷無人收拾，理則那方。今太平日  
無事，柄任儒術。宗丘軻安能以此上論列，願借辯口如懸河石鼓  
之歌，止於此。嗚呼！吾意其蹉跎。

古劍歌

郭元振

君不見昆吾鐵冶飛炎煙，紅光紫氣俱赫然。良工鍛鍊凡幾年，鑄  
得寶劍名龍泉。龍泉顏色如霜雪，良工咨嗟歎竒絕。琉璃玉匣吐  
蓮花，錯鏤金環生明月。正逢天下無風塵，幸得用防君子身。精光  
黯黯青蛇色，文章片片綠龜鱗。非直結交遊俠子，亦曾親近英雄  
人。何言中路遭棄捐，零落飄淪古獄邊。雖復沉埋無所用，猶能夜  
夜氣衝天。

磨鏡篇

劉禹錫

流塵翳明鏡，歲久看如漆。門前負局生，爲我一磨拂。萍開綠池滿，

暈盡金波溢白日照空心圓光走幽室山神杖氣沮野魅真形出  
却思未磨時瓦礫來唐突

贈友人古鏡

朱晝

我有古時鏡初自壞陵得蛟龍猶泥蟠魑魅幸月蝕磨久見菱蘘  
青於藍水色贈君將照心無使心受惑

團扇歌

劉禹錫

團扇復團扇奉君清暑殿秋風入庭樹從此不相見上有乘鸞女  
蒼蒼網蟲遍明月入懷袖別是機中練

彈琴

劉希戩

碧山木岑寂素琴何清幽彈爲風入松崖谷颯以秋庭鶴舞白雪  
泉魚躍洪流余欲娛世人明月難暗投感嘆未終曲淚下不可收  
嗚呼鍾子期零落歸山丘死而若有知魂兮從我遊

江上琴興

常建

江上調玉琴一絃清一心泠泠七絃變萬木澄幽陰能使江月白



又令江水深始知梧桐枝可以徵黃金

聽蜀僧濬彈琴

李白

蜀僧抱綠綺西上峨眉峯爲我一揮手如聽萬壑松客心洗流水  
餘響入霜鍾不覺碧山暮秋雲暗幾重

奉和張舍人閣中直夜思聞雅琴因書事

呂溫

迢遞天上直寂寞丘中琴憶爾山水韻起予仁智心疑情在正始  
超想踈煩襟涼生子夜後月照禁垣深遠風藹蘭氣微露清桐陰  
方襲緇衣慶未奉南薰吟

聽彈風入松贈楊補闕

王昌齡

商風入我絃夜竹深有露絃悲與林寂清景不可度寥落幽居心  
颼颼青松樹松風吹草白溪水寒日暮聲意去復還九變待一顧  
空山多雨雪獨立君始悟

金陵聽韓侍御吹笛

李白

韓公吹玉笛個儻流玉音風吹繞鍾山萬壑皆龍吟王子停鳳管

師襄掩瑤琴餘響渡江去天涯安可尋

武昌老人說笛歌

劉禹錫

武昌老人七十餘手把庾令相聞書自言年少學吹笛早事曹王  
曾賞激往年征鎮戍蘄州楚山蕭蕭笛竹秋當時買林恣搜索典  
却身上烏貂裘古苔蒼蒼封老節石上孤生飽風雪商聲五音隨  
指發水中龍應行雲絕曾將黃鶴樓上吹一聲占盡秋江月如今  
老去興猶遲音韻高低耳不知氣力已無心尚在時時一曲夢中  
吹

題老張松樹

宋之問

歲晚東巖下周顧何悽惻日落西山陰衆草起寒色中有喬松樹  
使我長嘆息百尺無寸枝一生自孤直

古栢行

杜甫

孔明廟前有老栢柯如青銅根如石霜皮溜雨四十圍黛色參天  
二千尺君臣已與時際會樹木猶爲人愛惜雲來氣接巫峽長月

出寒通雪山白憶昨路遶錦亭東  
先主武侯同闕宮崔嵬枝幹郊  
原古窈窕丹青戶牖空落落盤踞  
雖得地冥冥孤高多烈風扶持  
自是神明力正直元因造化功  
大厦如傾要梁棟萬牛迴首丘山  
重不露文章世已驚未辭翦伐誰  
能送苦心未免容螻蟻香葉曾  
經宿鸞鳳志人幽士莫怨嗟古來  
才大難爲用

與東方左史脩竹篇

并序

陳子昂

東方公足下文章道弊五百年矣漢魏風骨晉宋莫傳然而文獻  
有可徵者僕嘗暇時觀齊梁間詩彩麗競繁而興寄都絕每以永  
嘆竊思古人常恐逶迤頽靡風雅不作以耿耿也一昨於解三處  
見明公詠孤桐篇骨氣端翔音情頓挫光映朗練有金石聲遂用  
洗心飾視發揮幽鬱不圖正始之音復覩於茲可使建安作者相  
視而笑解君云張茂先何敬祖東方生與其比肩僕亦以爲知言  
也故感嘆雅製作脩竹詩一篇當有知音以傳示之

龍種生南岳孤翠鬱亭亭峯頂上崇峯煙雨下微冥夜聞鼯鼠叫

晝聒泉壑聲春風正淡蕩白露已清冷哀響激金奏密色滋王英  
歲寒霜雪苦含彩獨青青豈不厭凝冽羞比春木榮春木有盈歇  
此節無凋零始願比金石終古保堅貞不意伶倫子吹之學鳳鳴  
遂偶雲緜瑟張樂奏天庭妙曲方千變籥韶已九成信蒙雕斲美  
常願事僊靈驅馳翠蚪駕伊鬱紫鸞爲空結交羸臺女吟弄昇天行  
携手登白日遠遊戲赤城低昂玄鶴舞斷絕彩雲生永隨衆仙去  
三山遊王京

種竹并序

元稹

昔樂天贈余詩云無波古井水有節秋竹竿余秋來種竹廳下因  
而有懷聊書十韻

昔公憐我直比之秋竹竿秋來苦相憶種竹廳前看失地顏色改  
傷根枝葉殘清風猶浙浙高節空團團鳴蟬聒莫景跳蛙築幽欄  
塵土復晝夜梢雲良獨難丹丘信云遠安得臨仙壇公瘴冬草綠  
何人驚歲寒可憐亭亭幹一一青琅玕孤鳳竟不至坐傷時節闌

竹逕偶作

權德輿

退朝此休沐閉戶無塵氛  
支策入幽逕清風隨此君  
琴觴恣偃傲蘭蕙相葢  
蓋幽賞方自適林西煙景曛

露青竹鞭歌

顧況

鮮于仲通正當年章仇兼瓊在蜀川  
約東蜀兒採馬鞭蜀兒採鞭不敢眠  
橫截斜飛飛鳥邊繩橋夜上層崖  
巔頭插白雲跨飛泉採得馬鞭長  
且堅浮漚丁子珠聯聯灰煮蠟  
揩光爛然章仇兼瓊持上天上天  
雨露何其偏飛龍閑廢馬數千  
朝飲吳江夕秣燕紅塵撲轡汗  
濕羈師子麒麟聊比肩曲江昆明  
洗刷牽四蹄踏浪頭耕天蛟龍  
稽顙河伯虔拓羯胡鷄脚手鮮  
陳閔韓幹丹青妍欲貌未貌眼欲  
穿金鞍玉勒錦連乾騎入桃花楊  
柳煙十二樓中奏管絃樓中美人  
奪神仙爭愛大家把此鞭祿山入  
關關破年忽見揚州北邙前祇有  
人還千一錢亭亭筆直無皺節磨  
將形相一條鐵市頭格是無人別  
江海賤臣不拘縛垂鞘挂影西窓  
缺稚子覓衣挑

仰穴家僮拾薪幾拗折玉潤猶霑玉壘雪碧鮮似滌莫弘血蜀帝  
祠邊子規咽相如橋上文君絕往來策馬降至尊七盤九折橫劍  
門穆王八駿超崑崙安用冉冉孤生根聖人不貴難得貨金玉珊  
瑚誰買恩

暑日題道邊樹

王穀

火輪迸焰燒長空浮埃撲面愁濛濛嬴僮走馬喘不進忽逢碧樹  
含清風清風留我移時住滿地濃陰懶前去却嘆人無及物功不  
似團團道邊樹

井上桐

陸龜蒙

美人傷別離汲井常待曉愁因轆轤轉驚起雙棲鳥獨立傍銀牀  
碧桐風嫋嫋

石上藤

岑參

石上生孤藤弱蔓依石長不逢高枝引未得凌空上何處堪託身  
爲君長萬丈

兔絲

元稹

人生莫依倚，依倚事不成。君看兔絲蔓，依倚榛與荆。荆榛易蒙密，百鳥撩亂鳴。下有狐兔穴，奔走亦縱橫。樵童斫將去，柔蔓與之并。翳蒼生可耻，束縛死無名。桂樹月中出，珊瑚石上生。俊鶻渡海食，應龍昇天行。靈物本特達，不復相纏縈。縈縈竟何者，荆棘與飛莖。

春草謠

顧況

春草不解行，隨人上東城。正月二日，月色綿綿千里，萬里傷人情。

王兵馬使二角鷹

杜甫

悲臺蕭颯石龍窠，哀竒枒浩呼沟中有萬里之長江。迴風陷日，孤光動角鷹。翻倒壯士臂，將軍玉帳軒翠氣。二鷹猛腦徐侯隄，目如愁胡視天地。杉雞竹兔不自惜，溪虎野羊俱闕易。韝上鋒稜十二翻，將軍勇銳與之敵。將軍樹勳起安西，崑崙虞泉入馬蹄。白羽曾肉三狻猊，敢決豈不與之齊。荆南芮公得將軍，亦如角鷹下翔雲。惡鳥飛飛啄金屋，安得爾輩開其群。驅出六合梟鷹分。

觀放白鷹

李白

八月邊風高，胡鷹白錦毛。孤飛一片雪，百里見秋毫。

飛鷲操

劉禹錫

鷲飛杳杳青雲裏，鷲鳴蕭蕭風四起。旗尾飄揚勢漸高，箭頭啣割聲相似。長空悠悠霽日懸，六翮不動凝非煙。游鷲翔鷹出其下，慶雲清景相迴旋。忽聞饑鳥噪，相聚瞥下雲中爭。腐鼠騰音礪吻相喧呼，仰天大嚇疑鷲鷲。畏人避大投高處，俛啄無聲猶屢顧。青鳥自愛玉山禾，仙禽徒貴華亭露。撲檄危巢向暮時，陪鯁飽腹蹲枯枝。遊童挾彈一麾肘，臆碎羽分人不悲。天生衆禽若有類，威鳳文章在仁義。鷹隼儀形螻蟻心，雖能喉天何足貴。

百舌吟

曉星寥落春雲低，初聞百舌間關啼。花枝滿空迷處所，搖動繁英墜。紅雨筍筍百轉音，韻多黃鸝吞聲燕。無語東方朝日遲，遲升迎風弄景如自驚。數聲不盡又飛去，何許相逢綠楊路。縣壘宛轉似



娛人一心百舌何紛紜醜顏俠少傳歌聽墮珥妖姬和睡聞可憐  
光景何時盡誰能低回避鷹隼廷尉張羅自不關潘郎挾彈無情  
指天生羽族爾何微舌端萬變乘春暉南方朱鳥一朝見索漠無  
言蒿下飛

鸚鵡詞

蘇郁

莫把金籠閉鸚鵡箇箇分明解人語忽欲更向君前語三十六宮  
愁幾許

鴛鴦篇

陳子昂

飛飛鴛鴦鳥舉翼相蔽虧俱來淶潭裏共向白雲涯音容相眷戀  
羽翮兩遠迤瑄繁戲春渚霜霰達寒池浦沙連岸淨汀樹拂潭垂  
年年此遊翫歲歲來追隨鳳凰起丹穴獨向梧桐枝鴛鴦來紫塞  
空憶稻梁施烏啼倦依託鶴鳴傷別離豈若此雙禽翻飛不異林  
刷羽清江浦交頸紫山岑文章負奇色和鳴多好音聞有鴛鴦綺  
復有鴛鴦衾持爲美人贈勗此故交心

子規啼

韋應物

高林滴露夏夜清  
南山子規啼一聲  
鄰家嬌婦抱兒泣  
我獨展轉何爲情

鷓鴣吟

劉禹錫

朝陽有鳴鳳不聞千萬祀  
鷓鴣催衆芳畏聞先入耳  
秋風白露晞從是爾啼時  
如何上春日唧唧滿庭飛

春蟬

元稹

我自東歸日厭苦春鳩聲  
作詩憐化工不遣春蟬生  
及來商山道山深氣不平  
春秋兩相似虫豸百種鳴  
風松不成韻蜩蟬涕如羹  
豈無朝陽鳳羞與微物爭  
安得天上雨奔渾河漢  
傾蕩滌反時氣然後好晴明

江上蚊子

韋楚老

搖袂翅亞紅腹江邊夜起如雲哭  
請問貪婪一點心腐肉填腹幾  
多足越女如花住江曲寒娥夜夜凝  
雙綠任君撩亂錦窻中十幅

輕綃圍夜玉

戲題關門

岑參

來亦一布衣去亦一布衣羞見關城吏還從舊路歸

門前路

陸龜蒙

門前向城路一直復一曲曲去日中還直行日暮宿何必日中還  
曲塗荆棘間

重校正唐文粹卷第十七上

重校正唐文粹卷第十七下

吳興姚

鉉

纂

詩十二 摠五十六首

古調歌篇八

月明河四

月生句 劉猛

把酒問月 李白

月蝕詩 盧仝

明河篇 宋之問

風雨露雪六

賀雨詩 白居易

洛陽清明日雨霽 李正封

詠露

山雪 釋皎然

秋風引 劉禹錫

竹牕聞風寄苗發詩空曙 李益

江海泉水十

觀海 獨孤及

西陵口觀海 薛據  
題玉潭 獨孤及

及第後過楊子江 施肩吾

責漢水詞 李善夷

迎潮送潮詞二首 陸龜蒙

引泉詩

賦得三峽流泉歌 李季蘭

明水篇 富嘉謨

宮禁七

殿前曲 王昌齡 西施篇 王維

三閣詞四首 劉禹錫

霓裳羽衣曲 李肱

神仙二十九

遊仙詩十六首 道士吳筠

上元夫人詩 李白

王子喬 宋之問

玉真仙人詞 李白 夢太白峯西 常建

苦篁調笑引 李賀 少室山韋鍊師昇仙歌 皇甫冉

宿青牛谷梁鍊師仙居 楊衡 玄都壇歌 杜甫

寄全椒山中道士 韋應物 洗心 道士司馬退之

齋心 王昌齡 寄菖蒲 張籍 金璫玉佩歌 顧況

月生句

劉猛

月生十五前日望光彩圓月滿十五後日畏光彩瘦不見夜花色

一樽成暗酒匣中苔背銅光短不遍空不惜補明月慙無此良工

把酒問月

故人賈淳令余問之

李白

青天有月來幾時我今停盃一問之人攀明月不可得月行却與人相隨皎如飛鏡臨丹闕綠煙滅盡清輝發但見宵從海上來寧知曉向雲間沒白兔搗藥秋復春姮娥孤棲誰與鄰今人不見古時月今月曾經照古人古人今人若流水共看明月皆如此唯願當歌對酒時月光長照金樽裏

月蝕詩

盧仝

新天子即位五年歲次庚寅斗柄插子律調黃鍾森森萬木夜殭立寒氣聳肩頑無風爛銀盤從海底出出來照我草屋東天色紺滑凝不流冰光交貫寒瞳矐初疑白蓮花浮出龍王宮八月十五夜比並不可雙此時怪事發有物吞食來輪中輪如壯士斧斫壞桂似雪山風拉摧百鍊鏡照見膽平地埋寒灰火龍珠飛出腦却入蚌蛤胎槌環破壁眼看盡當天一搭如煤炘磨蹤滅跡須臾間

便似萬古不可開不料至神物有此大狼狽星如撒沙出爭頭事  
光大奴婢炷燈看揜鳥感切莢如玳瑁今夜吐燄如長虹孔隙千道  
射戶外玉川子涕泗下中庭獨自行念此日月者太陰太陽精皇  
天要識物日月乃化生走天汲汲勞四體與天作眼行光明此眼  
不自保天公行道何由行吾見陰陽家有說望日蝕月光滅朔  
月掩日日光缺兩眼不相攻此說吾不容又孔子師老子云五色  
令人目盲吾恐天似人好色則喪明幸且非春時萬物不嬌榮青  
山破瓦色淥水冰崢嶸花枯無女艷鳥死沉歌聲頑冬何所好偏  
使一目盲又聞古老說蝕月蝦蟆精徑圓千里入汝腹如此癡駭  
阿誰生可從海窟來便解緣清冥恐是睚睫閒揜塞所化成黃帝  
有二目帝舜重瞳明二帝懸四目四海生光輝吾不遇二帝滉漭  
不可知何故瞳子上坐使蟲豸欺長嗟白兔搗靈藥恰似有意防  
姦非藥成蒲白不中度委任白兔夫何爲憶昔堯爲天十日燒九  
州金燦水銀流玉熠丹砂燠六合烘爲窰堯心增百憂天見堯心

憂勃然發怒決洪流立擬沃殺九日妖天高日走沃不及但見萬  
國赤子戢戢生魚頭此時九御導九日爭持節幡麾幢旒駕車六  
九五十四頭蛟螭蚪掣電九火輶汝若蝕開齟齬輪御轡執索相  
爬鉤推蕩轟濁入汝喉紅鱗燄鳥燒口快翎鬣倒側聲酸鄒撐腸  
拄肚礪礪如山丘自可飽死更不偷不獨填飢坑亦解堯心憂恨  
汝時當食埋頭撒腦不肯食不當食張唇哆嘴食不休食天之眼  
養逆命安得上帝請汝劉嗚呼人養虎被虎齧天媚墓被墓瞎乃  
知恩非類一一自作孽吾見患眼人必索良工諛想天不異人愛  
眼固應一安得常娥氏來習扁鵲術手操春喉戈去此睛上物初  
旣猶朦朧旣久如抹漆但恐功業成便此不吐出玉川子又涕泗  
下心禱再拜額塌沙土中地上蟻虱臣全告訴帝天皇臣心有鐵  
一寸可剗妖墓痠腸皇天不爲臣立梯磴臣血肉身無由飛上天  
揚天光封詞付與小心風颭排閭闥入紫宮密邇玉几前劈拆奏  
上臣全頑愚曾敢死橫干天甚長東方蒼龍角插戟尾押風當心



開明堂統領三百六十鱗蟲坐治東方宮月蝕不救援安用東方  
龍南方火鳥赤潑血項長尾短飛跋刺頭戴井冠高達杓月蝕鳥  
宮十二度鳥爲居停主人不覺察貪向何人家行赤口毒舌毒蟲  
頭上喫却月不啄殺虛貶鬼眼赤突音窳鳥罪不可雪西方攫虎  
立掎掎音斧爲牙鑿爲齒偷犧性食封豕大墓一齧固當軟美見  
似不見是何道理爪牙根天不念天天若准擬錯准擬北方寒龜  
被蛇縛藏頭入殼如入獄蛇筋束緊束破殼寒龜夏鼈一種味且  
當矐其肉一底板沒信處唯堪支牀脚不中鑽灼與天下卜歲星  
主福德官爵奉董秦忍使黔婁生覆尸無衣巾天失眼不弔歲星  
胡其仁焚惑矍鐐公執法大不中月明無罪過不糾蝕月蟲年年  
十月朝太微支虛謫罰何災凶土星與土性相背反卷福德生禍  
害到人頭上死破敗今夜月蝕安可會大白真將軍怒激鋒鏑生  
恒州陣斬鄴定進項骨脆甚春蔓菁天唯兩眼夫一眼將軍何處  
行天兵辰星任廷尉天律自主持人命在盆底固應樂見天盲時

天若不肯信試喚臯陶鬼一問而今三台文章官作上天紀綱環  
天二十八宿磊落尚書郎整頓排班行劔握他人將一四太陽側  
一四天市旁操斧代大匠兩手不怕傷弧矢引滿反射人天狼呀  
咏明煌煌癡牛與騃女不肯勤農桑徒勞含淫思旦夕遙相望崑  
尤簸旗弄旬始搥天鼓鳴璫琅枉矢龍蛇行眉目森森張天狗下  
舐地血流何滂滂譎險萬萬黨構架何可當眯目疊成就害我光  
明王請留北斗一星相比極指揮萬國懸中央此外盡掃除沙磧  
如山岡贖我父母光當時恒星沒殞雨如抨漿似天會事發叱喝  
誅姦狂何故中道廢自遺今日殃善善又惡惡郭公所以亡願天  
神聖心無信他人忠玉川子詞訖風色緊格格近月墨暗邊有似  
動劔戟須臾癡墓精兩吻自決圻初露半个壁漸吐蒲輪魄衆星  
盡原赦一墓獨誅磔腹肚忽脫落依舊挂穹碧光彩未蘇來慘淡  
一片白奈何萬里光受此吞吐厄再得見天眼感荷天地力或問  
玉川子孔子修春秋二百四十年月蝕盡不收今子咄咄詞頗合

孔意不玉川子笑荅或請聽逗遛孔子父母魯諱魯不諱周書外  
書大惡故月蝕不見收余命唐天口食唐土唐禮過三唐樂過五  
小猶不說大不可數災沴無有小大瘡安引衰周研覈可否日分  
書月分夜辨寒暑一主刑一主德政乃舉孰爲人面上一目偏可  
去願天完兩目照下萬方土更不瞽萬萬古

明河篇

宋之問

八月涼風天氣晶萬里無雲河漢明昏見南樓清且淺曉落西山  
縱復橫洛陽城闕天中起長河夜夜千門裏複道連櫳共蔽虧畫  
堂瓊戶特相宜雲母帳前初汎濫水精簾外轉逶迤倬彼昭回如  
練白復出東城接南陌南陌征人去不歸誰家今夜擣寒衣鴛鴦  
機上踈螢度烏鵲橋邊一鴈飛鴈飛螢度愁難歇坐見明河漸微  
沒已能舒卷任浮雲不惜光輝讓流月明河可望不可親願得乘  
槎一問津更將織女支機石還訪成都賣卜人

賀雨詩

白居易

皇帝嗣寶歷元和三年冬自冬及春暮不雨旱熯熯上心念下民  
懼歲成災凶遂下罪已詔殷勤告萬邦帝曰予一人繼天承祖宗  
憂勤不遑寧夙夜心忡忡元年誅劉闢一舉靖巴邛二年戮李錡  
不戰安江東顧惟眇眇德遠有巍巍功或者天降沴無乃儆于躬  
上思答天戒下思致時邕莫如率其身慈和與儉恭乃命罷進獻  
乃命賑飢窮宥死降五刑責已寬三農宮女出宣徽廐馬減飛龍  
庶政靡不舉皆出自宸衷奔騰道路人偃偻田野翁僮呼相告報  
感泣涕霑霄順人人心悅先天天意從詔下纔七日和氣生冲融  
疑爲油油雲散作習習風晝夜三日雨淒淒復濛濛萬心春熙熙  
百穀青芄芄人變愁爲喜歲易儉爲豐乃知王者心憂樂與衆同  
皇天及后土所感無不通冠珮何鏘鏘將相及王公蹈舞呼萬歲  
列賀明庭中小臣誠愚陋職忝金鑾宮稽首再三拜一言獻天聰  
君以明爲聖臣以直爲忠敢賀有其始亦願有其終

洛陽清明日雨霽

李正封

曉日清明天夜來嵩少雨千門尚煙火九陌無塵土酒醪河橋春  
漏閑宮殿午遊人戀芳草半犯嚴城鼓

詠露

霏霏靈液重雲表無聲落露樹急玄蟬灑池淒皓鶴流塵清遠陌  
飛月澄高閣宵潤玉堂簾曙寒金井索佳人比珠淚坐感紅綃薄

山雪

釋皎然

夕陽在西峯疊翠縈殘雪狂風卷絮迴驚猿攀玉折何意山中人  
誤報山花發

秋風引

劉禹錫

何處秋風至蕭蕭送鴈群今朝入庭樹孤客最先聞

竹窻聞風寄苗發司空曙

李益

微風驚暮坐臨牖思悠哉開門復動竹疑是故人來時滴枝上露  
稍霑塔下苔幸當一入幌爲拂綠琴埃

觀海

獨孤及

北登激海島回首秦東門誰尸造物功鑿此天池源  
瀆洞吞百谷周流無四垠廓然混茫際望見天地根  
白日自中吐扶桑如可捫迢遙蓬萊峯想像金臺存  
秦帝昔經此登臨異飛翻揚旌百神會望日羣山奔  
徐福竟何成羨門徒空言唯見石橋足千年潮水痕

西陵口觀海

薛據

浙江漫漫湯湯近海勢彌廣在昔胚混凝融爲百川  
長地形失端倪天色潛滉瀆東南際萬里極目遠無  
象山影乍浮沉潮波忽來徃孤帆或不見棹歌猶  
響像日暮長風起客心空振蕩浦口霞未收潭心  
月初上林嶼幾遭迴亭臯時偃仰歲晏訪蓬瀛真遊  
非外獎

題玉潭

獨孤及

碧玉徒強名冰壺難比德唯當寂照心可並淪淪色

及第後過楊子江

施肩吾

憶昔將貢年抱愁此江邊魚龍互閃爍黑浪高於天  
今日步春草復來經此道江神也世情爲我風色好

青漢水辭并序

李善夷

春秋僖公四年齊桓公合諸侯之師盟于召陵責楚之苞茅不入問昭王南征而不復楚子使屈完對曰貢之不入寡君之罪也敢不供給昭王南征之不復君其問諸水濱按昭王南征至漢舟人膠其舟王遂溺死杜預曰當時漢水未屬楚杜之注其爲謬哉且楚實殷之始封楚苦縣瀨鄉在漢水東北六百餘里則漢水於西周之際豈未屬楚乎又詩云撻彼殷武奮伐荆楚深入其阻哀荆之旅鄭玄注云深入方城之阻也方城今在漢水北三百里豈昭王時未屬楚乎屈完改齊桓所問之大不敢他對但請自問於水濱之人言我不之知也漢實屬楚久矣夫山林川澤天子祀之必有其神楚人膠其船而禍其君神不能福神之罪也余過漢見其波濤混漲而責其水詞曰

漢之廣兮風波四起雖有風波不如蹄涔之水蹄涔之水不爲下國而傾天子漢之深兮其隄莫量雖云莫量不如行潦之汪行潦

之汪不爲下國而溺天王漢之美者曰魴吾雖飢不食其魴恐汚  
吾之飢腸

迎潮送潮詞二首 并序

陸龜蒙

余耕稼所在松江南旁田廬門外有溝通浦淑而朝夕之潮至焉  
天弗雨則軋而留之用以滌濯灌溉及物之功甚鉅其羸壯遲速  
繫望晦盈虛也用之則順而進捨之則默以退有類乎君子之道  
翫而感之作迎潮送潮詞二首聊寄聲於騷人之末

江霜嚴兮楓葉丹潮聲高兮墟落寒鷗巢卑兮漁箔短遠岸沒兮  
光爛爛潮之德兮無際既充其大兮又充其細密幽人兮款柴門  
寂寞流連兮依稀舊痕濡餘澤槁兮潮之恩不尸其功兮歸于混  
元

右迎潮

潮西來兮又東下日染中流兮紅灑灑汀葭蒼兮水蓼枯風騷牢  
兮愁煙孤大幾望兮微將翳晦搜瀛溶兮斂然而退愛長波兮數



數一幅巾兮無纓可濯帆生塵兮棹有衣悵潮之還兮吾猶未歸

右送潮

引泉詩

睦州龍興觀老君院作

上嗣位六載吾宗刺桐川余來拜旌戟詔下之明年是時春三月  
繞郭花蟬聯嵐盤百萬髻上插黃金鈿授以道士館置榻于東偏  
滿院聲碧樹空堂形老仙本性樂疑淡及來更虛玄焚香禮眞像  
盥手披靈編新安山角角烏龍獨巉然嶋隴除非淨晴日不見蒼  
崖巔上有拏雲峯下有噴壑泉泉分數十汊落處皆崢嶸寒聲入  
爛醉聒破西窻眠支筇起獨尋祇在墻東邊呼僮具畚鍤立鑿鑿莓  
苔穿濛濛一派墮練帶橫斜牽亂石拋落落寒流響濺濺狂怒七  
里瀨縮到踈楹前跳光潑半散湧沫飛旋圓勢東三峽挂瀉危孤  
磴懸曾聞瑤池溜亦灌朱草田鳧伯弄翠藻鸞鶴舞丹煙凌風捩  
桂桅隔霧馳犀舩况當玄元家嘗著道德篇上善可比水斯文叅  
五千精靈若在此肯惡微波傳不擬爭滴瀝還應會淪連出門後

飛箭合勢浮青天必有學真子鹿冠秋鶴顏如能輔吾志日使疏  
其源

賦得三峽流泉歌

李季蘭

妾家本住巫山雲巫山流水常自聞玉琴奏出轉寒更直似當時  
夢中聽三峽迢迢幾千里一時流入幽闈裏巨石崩崖指下生飛  
波遠浪弦中起初疑噴怒含雷風復似鳴咽流不通迴湍曲瀨意  
將盡時復滴瀝平沙中憶昔阮公爲此曲能使仲容聽不足一彈  
既畢還一彈願比流泉鎮相續

明冰篇

富嘉謨

北陸蒼茫河海凝南山闌干晝夜冰素彩裁我明月升深山窮谷  
不自見安知採斲備嘉薦陰房固牙掩寒扇陽春二月朝始暾春  
光潭洩度千門明冰時出御至尊彤庭赫赫九儀備署玉煌煌千  
官事明冰畢歲周在位憶昔沙朔寒風漲崑崙長河冰始壯漫汗  
峻嶒積亭障邕邕鳴鴈江上來禁苑池臺冰復開搖春涵綠映樓

臺幽歌七月王風始明冰藏用照物軌四時不忒千萬祀

殿前曲

王昌齡

貴人粧梳殿前催香風吹入殿後來仗引笙歌大宛馬白蓮花發  
照池臺

西施篇

王維

豔色天下重西施寧久微朝爲越溪女暮作吳宮妃賤日豈殊衆  
貴來方悟稀邀人傅香粉不自著羅衣君寵益嬌態君憐無是非  
當時浣紗伴莫得同車歸寄謝鄰家子效顰安可希

三閣詞

吳音四首

貴人三閣上日晏朱梳頭不應有恨事嬌甚卻成愁  
珠箔曲瓊鈎子細見楊州北兵那得渡浪語聲悠悠  
沉香帖閣柱金縷畫門楣迴首降幡下已見黍離離  
三人出智井一身登檻車朱門設臨水不得見鱸魚

霓裳羽衣曲

李肱

開元太平日萬國賀豐歲梨園厭舊曲玉座流新製鳳管遞參差  
霞衣競搖曳宴罷水殿空輦餘春草細蓬壺事已久仙樂功無替  
詎肯聽遺音聖明知善繼

遊仙十六首

道士吳筠

啓冊觀往載搖懷考今情終古已寂寂舉世何營營悟彼衆仙妙  
超然含至精凝神契沖玄化服凌太清心同宇宙廣體合雲霞輕  
翔風吹羽蓋慶霄拂霓旌龍駕朝紫微後天保令名豈如寰中士  
軒冕矜暫榮

鸞鳳棲瑤林鷓鴣集平楚飲啄本殊好翱翔終異所吾方遺誼賢  
立節慕高舉解茲區中戀結彼霄外侶誰謂天路遐感通自無阻  
愍俗從遷謝尋仙去淪沒三元有真人與我生道骨凌晨吸丹景  
入夜飲黃月百關彌調暢方寸益清越棲神合虛無洞覽周恍惚  
不覺隨玉皇焚香詣金闕

西龜初定籙東華已校名三官無遺譴七祖昇雲輶體妙塵累隔

心微玄化并一朝出天地億載猶童嬰使我齊浩劫蕭蕭宴玉清  
怡神在靈府皎皎含清澄仙經不吾欺輕舉信有徵疇昔希道念  
而今果天矜豈非陰功著乃致白日昇焉用過洞府吾其越朱陵  
高真誠寥邈道合不我遺孰謂姑射遠神人可同嬉結駕從之遊  
飄飄出天垂不理人自化神凝物無疵因知至精感足以和四時  
八海廣無際三山高不極金臺羅中天羽客恣遊息霞液朝可飲  
虹芝晚堪食嘯歌自忘心騰舉寧假翼保壽同三光安能幾千億  
將過大帝宮暫詣扶桑處真童已相迂爲我清宿霧海若寧洪濤  
義和止奔馭五雲結層閣八景動飛輿青霞正可挹丹堪時一遇  
留我宴玉堂歸軒不令遽

欲趨洞陽界試覽丹極表赤帝躍火龍炎官控朱鳥導我昇絳府  
長驅出天杪陽靈赫重暉四達何皎皎爲爾流飄風羣生遂無天  
予因詣金母飛蓋超西極遂入素中天停輪太濛側若華拂流影  
不使白日匿頽曦復亭午六合無暝色道化隨感遷此理誰能測

九龍何蜿蜿載我昇雲網臨睨懷舊國風塵混蒼茫依依遠人寰  
去去通帝鄉上超星辰紀下視日月光倏已過太微天居煥煌煌  
停驂太儀側整服金闕前肅肅承上帝鏘鏘會羣仙鴻鑪發靈香  
廣廡張鈞天王醴洽中座霞膏充四筵良期無終極俛仰移億年  
峻朗妙門闢澄微真鑿通瓊林九霞上金閣三天中飛蚪躍慶雲  
翔鶴搏靈風鬱彼玉京會仙期六合同

予昇至陽源欲憇明霞館飄飄瓊輪舉曄曄金景散結虛成萬有  
高妙咸可翫玉山鬱嵯峨琅海杳無岸整賞過千椿遐齡誰復筭  
招攜紫陽友合宴玉清臺排景羽衣振浮空雲駕來靈旛七曜動  
瓊障九光開鳳舞龍璇奏蚪軒殊未迴

高昇紫極上宴此玄都岑玉藥散竒香瓊珂流雅音靈風生太漠  
習習吹人襟體混希微廣神疑空洞深蕭然宇宙外自得乾坤心

上元夫人詩

李白

上元誰夫人偏得王母嬌嵯峨三角髻餘髮散垂腰裘披青色錦

身著赤霜袍，手提羸女兒。閑與鳳吹簫，眉語兩自笑。忽然隨風飄。

王子喬

宋之問

王子喬愛神仙，七月七日上賓天。白虎搖瑟，鳳吹笙，乘騎雲氣，翕日精，喻日精，長不歸，遺廟今在而人非。空望山頭草，草露濕君衣。

玉真仙人詞

李白

玉真之真人，時往太華峯。清晨鳴天鼓，颺歛騰雙龍。弄霓不輟手，行雲本無蹤。幾時人少廣，王母應相逢。

夢太白西峯

常建

夢寐昇九崖，杳靄逢元君。貴我太白岑，寥寥辭垢氛。結宇在星漢，宴林閉氛氲。蒼楹覆餘翠，巾舄生片雲。時往溪谷間，孤亭晝仍曛。松峯引天影，石瀨清霞文。括目緩舟趣，齊心投鳥羣。春風又搖櫂，潭島花紛紛。

苦篁調笑引

李賀

請說軒轅在時事，伶倫采竹二十四。伶倫采之自崑丘，軒轅以之

調元氣當時黃帝上天時二十三管咸相隨唯留一管人間吹無德不能得此管此管沉埋虞舜祠

少室山常鍊師昇仙歌

皇甫冉

紅霞紫氣甚氤氳絳節青童迎少君忽從林下昇天去空使時人禮白雲

宿青牛谷梁鍊師仙居

楊衡

隨雲步入青牛谷青牛道士留我宿可憐夜久月明中唯有壇邊一枝竹

玄都壇歌寄元逸人

杜甫

故人昔隱東蒙峯已佩含景蒼精龍故人今居子午谷獨在陰崖結茅屋屋前太古玄都壇青石漠漠松風寒子規夜啼山竹裂王母晝下雲旗翻知君此計誠長往芝草琅玕日應長鐵鑷高垂不可攀致身福地何蕭爽

寄全椒山中道士

韋應物



今朝郡齋冷，忽念山中客。澗底束荆薪，歸來煮白石。欲持一瓢酒，遠慰風雨夕。落葉遍空山，何處尋行跡。

洗心

道士司馬退之

不踐名利道，始覺塵土腥。不味稻粱食，始覺神骨清。羅浮奔走外，日月無短明。山瘦松亦勁，鶴老飛更輕。逍遙此中客，翠髮皆長生。草木多古色，雞犬無新聲。君有出俗志，不貪英雄名。傲然脫冠帶，改換人間情。去矣丹霄步，向曉雲冥冥。

齋心

王昌齡

女蘿覆石壁，溪水幽濛濛。紫葛蔓黃花，娟娟寒露中。朝飲花上露，夜卧松下風。雲英化為水，光彩與我同。日月蕩精魂，寥寥天府空。

寄菖蒲

張籍

石上生菖蒲，一寸十二節。仙人勸我食，令我頭青面如雪。逢人寄君一絳囊，書中不得傳此方。君能來作棲霞侶，與君同入丹玄鄉。

金璫玉珮歌

顧況

贈君金璫太霄之玉珮金鎖禹步之流珠五嶽真君之祕籙九天  
丈人之寶書東井沐浴辰巳畢先進洞房上奔日借問君從何處  
來黃姑織女機邊出

重校正唐文粹卷第十七之下



重校正唐文粹卷第十八

吳興姚

鉉

纂

詩壬

摭一百三十六首

古調歌篇九

感寓五十

感寓詩三十八首

陳子昂

感寓七首

張九齡

感寓

權德輿

效陳拾遺感寓二首

司空圖

古意二首

孫詒

詠史二十一

詠史十一

李華

詠史

高適

詠史二首

釋皎然

詠史二首

劉禹錫

詠史四首

盧照鄰

讀李斯傳

曹翬

慨嘆三十五

出關作

魏徵

隴右途中遭非語

貞半千

書懷

劉幽求

自紀

皇甫松

贈友人

呂溫

贈韓愈二首

孟郊

贈喬林

劉春虛

寄唐生

白居易

華下司空圖

傷時二首

孟雲卿

封丘作

高適

街西居三首

姚合

效陳拾遺子昂

司空圖

感時

夜坐

張說

無可奈何歌

白居易

逢白公

元稹

感懷

黃冠卿

贈崔純亮

孟郊

客喜

賈島

有所思

宋之問

秦人謠

古之奇

時興

楊貴

聞砧有感

呂溫

野田行

于鵠

贈馮宿

李觀

偶然作二首

呂溫

及第後答潼關主人

朝飢

賈島

九日酬顧少府

高適

### 感物十六

觀玉篇

陳子昂

素絲

陸龜蒙

李都尉古劍

白居易

廢琴

廢瑟詞

張籍

說劍

元稹

春桂問答二首

王績

養鷲詞

劉禹錫

對菊

賈島

直鉤吟

盧仝

競渡

元稹

見牧牛人擔青草

張說

道州觀野火 呂溫 諭寶二首 元稹

春感八

送春曲三首 劉禹錫

衡州春早二首 呂溫

尋人偶題 邵真 題花樹 楊衡

惜花 陸龜蒙

秋感六

秋日 耿緯

秋夕懷遠 孟郊 蟋蟀詩 羅隱

秋思 司空圖

在郡秋懷二首 張九齡

感寓詩三十八首

陳子昂

微月生西海幽陽始化昇圓光正東滿陰魄已朝凝太極生天地  
三元更廢興至精諒斯在三五誰能徵

蘭若生春夏芊蔚何青青幽獨空林色朱蕤冒紫莖遲遲白日晚  
嫋嫋秋風生歲華盡搖落芳意竟何成

蒼蒼丁零塞今古緬荒途亭堠何摧兀暴骨無全軀黃沙莫南起  
白日隱西隅漢甲三十萬曾以事匈奴但見沙場死誰憐塞上孤

樂羊爲魏將食子殉軍功骨肉且相薄他人安得忠吾聞山中相  
乃屬放麋翁孤獸猶不忍况以奉君終

市人矜巧智於道若童蒙傾奪相夸侈不知身所終曷見玄真子  
觀世玉壺中杳然遺天地乘化入無窮

吾觀龍變化乃知至陽精石林何冥密幽洞無留行古之得仙道  
信與元化并玄感非象識誰能測淪冥世人拘目見酣酒笑丹經  
崐崙有瑤樹安得采其英

白日每不歸青陽時暮矣茫茫吾何思林卧觀無始衆芳委時晦  
鷓鴣悲鳴耳鴻荒古已頽誰識巢居子

吾觀崐崙化日月淪洞冥精魄相交構天壤以羅生仲尼推太極  
老聃貴窈冥西方金仙子崇議乃無明空色皆寂滅業緣定何成  
名教信紛籍死生俱未停

聖人祕元命懼世亂其真如何嵩公輩詆譎誤時人先天誠爲美  
階亂禍誰因長城備胡寇羸禍發其親赤精旣迷漢子年何救秦

云去桃李花多言死如麻

深居觀元化悻然爭朵頤羣動相啖食利害紛嘖嘖便便夸毗子  
榮耀更相持務光讓天下商賈競刀錐已矣行采芝萬世同一時  
吾愛鬼谷子青谿無垢氛囊括經世道遺身在白雲七雄方龍鬪  
天下久無君浮榮不足貴導養晦時文舒可彌宇宙卷之不盈分  
豈徒山木壽空與麋鹿群

呦呦南山鹿離罟以媒和招搖青桂樹幽蠹亦成科世情甘近習  
榮耀紛如何怨憎未相復親愛生禍羅瑶臺傾巧笑玉杯殞雙蛾  
誰見孤城樹青青成斧柯

林居病時久水木澹孤清閑卧觀物化悠悠念無生青春始萌達  
朱火已滿羸俎落方自此感歎何時平

臨歧泣世道天命良悠悠昔日殷王子玉馬遂朝周寶鼎淪伊穀  
瑶臺成故丘西山傷遺老東陵有故侯

貴人難得意賞愛在須臾莫以心如玉採他明月珠昔稱天桃子



今爲春市徒鴟鴞悲東國麋鹿泣姑蘇誰見鴟夷子扁舟去五湖  
聖人去已久公道緬良難蚩蚩夸毗子堯禹以爲謾驕榮貴工巧  
勢利遞相干燕王尊樂毅分國願同歡魯連讓齊爵遺組去邯鄲  
伊人信往矣感激爲誰歎

幽居觀大運悠悠念羣生終古代興沒豪聖莫能爭三季淪周赧  
七雄滅秦嬴復聞赤精子提劍入咸京炎光旣無象晉魯復縱橫  
堯禹道已昧昏虐勢方行豈無當世雄天道與胡兵咄咄安可言  
時醉而未醒仲尼溺東夏伯陽遁西溟大運自古來旅人胡歎哉  
逶迤世已久骨鯁道斯窮豈無感激者時俗頽此風灌園何其鄙  
皎皎於陵子世道不相容嗟嗟張長公

聖人不利已憂濟在元元黃屋非堯意瑤臺安可論吾聞西方化  
清淨道彌敦奈何窮金玉彫刻以爲尊雲構山林盡瑤圖珠翠煩  
鬼功尚未可人力安能存夸愚適增累矜智道逾昏

玄天幽且默羣議曷咄咄聖人教猶在世運久陵遲一繩將何繫

憂醉不能持去去行采芝勿爲塵所欺

蜻蛉遊天下與世本無患飛飛未能止黃雀來相干穰侯富秦寵  
金石比交歡出入咸陽裏諸侯莫敢言寧知山東客激怒秦王肝  
布衣取丞相千載爲辛酸

微霜知歲晏斧柯始青青況乃金天夕浩露霑羣英登山望宇宙  
白日已西溟雲海方蕩瀾孤鱗安得寧

翡翠巢南海雄雌珠樹林何如美人意驕愛比黃金殺身炎洲裏  
委羽玉堂陰旖旎光首飾歲蕤爛錦衾豈不在遐遠虞羅忽見尋  
多材信爲累歎息此珍禽

挈瓶者誰子妖服當青春三五明月滿盈盈不自珍高堂委金玉  
微縷懸千鈞如何負公鼎被奪笑時人

玄蟬號白露茲歲已蹉跎羣物從大化孤英將奈何瑤臺有青鳥  
遠食玉山禾崑崙見玄鳳豈復虞雲羅

荒哉穆天子好與白雲期宮女多怨曠層城閉蛾眉日耽瑤臺樂

豈傷桃李時青苔空萎絕白髮生羅帷

朝發宜都渚浩然思故鄉故鄉不可見但見巫山陽巫山彩雲沒  
高丘正微茫佇立望已久涕淚霑衣裳豈茲越鄉感憶昔楚襄王  
朝雲無處所荆國亦淪亡

昔日章華宴荆王樂荒淫霓旌翠羽蓋射光雲夢林竭來高堂觀  
悵望陽雲岑雄圖今何在黃雀空哀吟

丁亥歲云暮西山事甲兵羸糧市叩道荷戟爭羌城嚴冬陰風勁  
窮岫油雲生昏黷無晝夜羽檄復相驚攀踞萬仞崩危遠九冥  
藉藉峯壑裏哀哀冰雪行聖人御宇宙聞道太階平肉食謀何失  
葵藿緬縱橫

可惜瑤臺樹灼灼佳人姿碧華映朱實攀折青春時豈不盛光寵  
榮君白玉墀但恨紅芳歇凋傷感所思

竭來豪遊子勢利禍之門如何蘭膏歎感激自生怨衆趨明所避  
時棄道猶存雲泉旣已失羅網與誰論箕山有高節湘水有清源

唯應白鷗鳥可爲洗心言

素居獨幾日炎夏忽然衰陽彩皆陰翳親友盡睽違登山望不見  
涕泣久漣漣宿夢感顏色若與白雲期世中驕豪子驅逐正嗤嗤  
蜀山與楚水攜手在何時

金鼎合神丹世人將見欺飛飛騎羊子胡乃在蛾眉變化固幽類  
芳菲能幾時疲痾苦淪世憂痲日侵溜眷然顧幽褐白雲空涕洟  
朔風吹海樹蕭條邊已秋亭上誰家子哀哀明月樓自言陰燕客  
結髮事遠遊赤丸殺公吏白刃報私讎避仇至海上被役此邊州  
胡鄉三千里遼水復悠悠每憤胡兵入常爲中國羞何知七十載  
白首未封侯

本爲貴公子平生實愛才感時思報國拔劍起蒿萊西馳丁令塞  
北上單于臺登山見千里懷古心悠哉誰言未忘禍磨沒成塵埃  
浩然坐何暮吾蜀有蛾眉念與楚狂子悠悠白雲期時哉悲不會  
涕泣久漣漣夢登綏山穴南采巫江芝探元觀竒化遺世從雲螭

婉孌將末矣感悟不見之

朝入雲中郡北望單于臺胡秦何密邇沙朔氣雄哉藉藉天驕子  
猖狂已復來塞垣無名將亭堠空崔嵬咄嗟吾何歎邊人塗草萊  
仲尼探元化幽鴻順陽和大運自盈縮春秋遞來過盲飈忽號怒  
萬物相紛劇溟海皆震蕩孤鳳其如何

感寓七首

張九齡

蘭葉春葳蕤桂華秋皎潔欣欣此生意自爾爲佳節誰知林棲者  
聞風坐相悅草木有本心何求美人折

幽林歸獨卧滯慮洗孤清持此謝高鳥因之傳遠情日夕懷空意  
人誰感至精飛沉理自隔何所慰吾誠

魚遊樂深池鳥棲欲高枝嗟爾蜉蝣羽薨薨亦何爲有生豈不化  
所感奚若斯神理日微滅吾心安得知浩歎楊朱子徒然泣路岐  
孤鴻海上來池潢不敢顧側見雙翠鳥巢在三珠樹矯矯珍木巔  
得無金丸懼美服患人指高明逼神惡今我遊冥冥其者何所慕

吳越數千里夢寐今夕見形骸非我親衾枕即鄉縣化蝶猶不識  
川魚安可羨海上有仙山歸期覽神變

抱影吟中夜誰聞此歎息美人適異方庭樹銜幽色白雲愁不見  
滄海飛無翼鳳凰一朝來竹花此可食

漢上有游女求思安可得袖中一書札欲寄雙飛翼冥冥獨不見  
耿耿徒緘憶紫蘭秀空蹊皓露奪幽色馨香歲欲晚感歎情何極  
白雲在南山日暮長太息

感寓

權德輿

殘雨倦欹枕病中時序分秋蟲與秋葉一夜隔窻聞虛室對搖落  
晤言無與羣冥心試觀化世故如絲棼但看鳶戾天豈見山出雲  
下俚徒擊節朱絃祕南薰倚梧秀朝陽上有威鳳文終待九成奏  
來儀瑞吾君

效陳拾遺子昂感寓二首

司空圖

高燕飛何捷啄害恣羣鷄人豈玩其暴華軒容爾居強欺自天稟

剛吐信吾徒乃知不平者矯世道終孤  
陽和含煦潤卉木競紛華當爲衆所悅私已汝何誇北里祕穠豔  
東園鎖名花豪奪乃常理笑君徒咄嗟

古意二首

擬梓州陳拾遺

孫邵

屈子生楚國七雄知其材介絜世不容跡合藏蒿萊道廢固命也  
瓢飲亦賢哉何事葬江魚空使後人哀  
魏禮段干木秦王乃止戈小國有其人大國奈之何賢哲信爲美  
兵甲豈云多君子戰必勝斯言聞孟軻

詠史十一首

李華

日照崑崙上羽人披羽衣乘龍駕雲霧欲往心無違此山在西北  
乃是神仙國靈氣皆自然求之不可得何爲漢武帝精意徧羣山  
糜費巨萬計宮車終不還蒼蒼茂陵樹足以戒人間

天生忠與義本以佐雍熙何意李司隸而當昏亂時古墳襄城野  
斜徑橫秋陂况不禁樵採茅莎無子遺高標尚可仰精爽今何之

一忤中常侍銜寃誰見知常觀黨錮傳撫卷心不勝悲

文侯耽鄭衛一聽一忘殮白雪燕姬舞朱紘趙女彈淫聲流不返  
怕蕩日無端獻歲受朝時鳴鐘醮百官兩壯陳管磬九奏殊未闌  
對此唯恐卧更能整衣冠

漢皇脩雅樂乘輿臨太學三老與五更天工親割牲一人調風俗  
萬國和且平單于驟款塞武庫欲銷兵文物以此朝盛君臣何穆清  
至今墳壇下如有簫韶聲

蜀主相諸葛功高名亦尊驅馳十萬衆怒日瞰中原曹伯任公孫  
國忘身不存杜宮久蕪沒白鴈猶飛翻勿言君臣合可以濟黎元  
爲蜀諒不易如曹難復論

秦滅漢帝興南山有遺老危冠揖萬乘幸得厭征討當君逐鹿時  
臣等已枯槁寧知市朝變但覺泉石好高卧三十年相看成四皓  
帝言翁甚善見顧何不早成稱太子仁重美表亦尊道側聞驪姬事  
申生不自保暫出商山雲竭來趨灑掃東宮成羽翼楚舞傷懷抱



後代無其人戾園滿秋草

六國韓最弱末年尤畏秦鄭生爲韓計且欲疲秦人利物可分社  
原情堪滅身咸陽古城下萬頃稻苗新

昂藏獬豸獸出自太平年亂代乃潛伏縱人爲禍愆常聞斷馬劍  
每壯朱雲賢身死名不滅塞風吹墓田精靈如有在幽憤滿松煙  
沂水春可涉泮宮映楊葉麗色異人間珊珊搖珮環展禽恒獨處  
深巷生禾黍城上飛海雲城中暗春雨適來鳴珮者復是誰家女  
泥沾珠綴履雨濕翠毛簪電影閉蓮臉雷聲飛蕙心自言沂水曲  
采蘋兼采菜歸逕雖可尋天陰光景促憐君貞且獨願許君家宿  
徒勞惜衾枕子不顧雙蛾豔質誠可重淫風如禮何周王惑褒姒  
城闕成陂池

巢許在嵩潁陶唐不得臣九州上洗耳一命安能親縣邈數千祀  
丘中誰隱淪朝遊公卿府夕是山林人蒲帛楊仄陋薜蘿爲摺紳  
九重念入夢三事思降神且設庭中燎寧窺泉下鱗

漢時征百越楊僕將樓船幕府功未立江湖已騷然島夷非敢亂  
政暴地仍偏得罪因懷壁防身輒控弦三軍求裂土萬里詎聞天  
魏闕心猶在旗門首已懸如何得良吏一爲制方圓

詠史一首

高適

尚有綈袍贈應憐范叔寒不知天下士猶作布衣看

詠史二首

釋皎然

田氏門下客馮公衆中賤一朝市義還百代名獨擅始知下客不  
可輕能使主人功業成借問高車與珠履何如庇賤一書生

獨負高世姿真真寄浮俗卜子去不歸何人識荆玉鬻春意不淺  
汚跡身豈辱鷹鷂樂迤邐蚪蟠甘窘束五噫譎且正可以見心曲

詠史二首

劉禹錫

驃騎非無勢少卿終不去世道劇頽波我心如砥柱

賈生明王道衛綰工車戲同遇漢文時何人居貴位

詠史四首

盧照鄰

昔有平陵男姓朱名阿游直髮上衝冠壯氣橫三秋願得斬馬劍  
先斷佞臣頭天子玉檻折將軍丹血流指生不肯拜視死其若休  
歸來教鄉里童蒙遠相求弟子數百人散在十二州三公不敢吏  
五鹿何能誦名與日月懸義與天壤儔何必疲執戟區區在封侯  
偉哉曠達士知命固不憂

季生昔未達身辱功不成髡鉗爲臺隸灌園變姓名幸逢滕將軍  
兼遇曹丘生漢祖廣招納一朝拜公卿百金孰云重一諾良匪輕  
廷議斬樊噲羣公寂無聲處身孤且直遭時坦而平丈夫當如此  
唯唯何足榮

大漢昔云季小人道遂振玉帛委關尹斧鑕嬰搢紳邈哉郭先生  
卷舒得其真雍容謝朝廷譚笑樊人倫在晦不絕俗處亂不爲親  
諸侯不得友天子不得臣冲情甄負甌重價折角巾悠悠天下士  
相送洛橋津誰知仙舟上寂寂無四鄰

公業負竒志交結盡才雄良田四百頃所食常不充一爲侍御史

慷慨說何公何公何爲敗吾謀適不同仲穎恣殘忍廢誠良在躬  
死人如亂麻天子如轉蓬干戈及黃屋荆棘生紫宮鄭生運其謀  
將以清國戎時來命不遂脫身歸山東凜凜千載下穆然懷清風

讀李斯傳

曹鄴

欺暗常不然欺明當自戮難將一人手掩得天下目

出關作

魏徵

中原初逐鹿投筆事戎軒縱橫計不就慷慨志猶存杖策謁天子  
驅馬出關門請纓繫南越憑軾下東蕃鬱紆陟高岫出沒望平原  
古木吟寒鳥空山啼夜猿旣傷千里目還驚父逝魂豈不憚艱險  
深懷國士恩季布無二諾侯嬴重一言人生感意氣功名誰復論

隴右途中遭非語

貞半干

趙有兩毛遂魯聞二曾參慈母猶且惑况在行路心冠冕無醜士  
賄賂成知己名利我所無清濁誰見理弊服空庭春綏帶不著身  
出遊非懷璧何憂乎忌人正須自保愛振衣在生塵

書懷

劉幽求

心爲明時盡君門尚不容  
田園迷徑路歸去欲何從

自紀

皇甫松

皇天后地力使我向此生  
貴賤不我均若爲天地情  
我家世道德肯意匡文明  
家集四百卷獨立天地經  
寄言青松姿豈羨朱槿榮  
昭昭大化光共此遺芳馨

贈友人

呂溫

南山雙喬松擢本皆千尋  
夕流膏露津朝被青雲陰  
負雪出深澗搖風倚高岑  
明堂久不構雲幹何森森  
匠意方雕巧時情正誇淫  
生材會有用天地豈無心

贈韓愈二首

孟郊

何以定交契贈君高山石  
何以保貞妍贈君青松色  
貧交過此外無可相彩飾  
更有其鼠詩吟之堪淚滴  
其鼠旣穿墉又齧機上絲  
穿墉有閑土齧機無餘絲  
朝吟枯桑柘暮泣空杼機  
豈是無巧妙

絲斷將何施衆人尚肥華志士多飢羸願君保此節天意當察微  
前日遠別離今日生白髮欲知萬里情曉卧半牀月常恐百蟲秋  
使我芳草歇

贈喬林

劉昫虛

去年上策不見收今年寄食仍淹留羨君有酒能便醉羨君無錢  
能不憂如今五侯不待客羨君不問五侯宅如今七貴方自尊羨  
君不過七貴門丈夫會應有知己世上悠悠何足論

寄唐生

白居易

賈誼哭時事阮籍哭路岐唐生今亦哭異代同其悲唐生者何人  
五十寒且飢不悲口無食不悲身無衣所悲忠與義悲甚則哭之  
太尉擊賊日段太尉以尚書叱盜時顏尚書叱大夫死兇寇陸大  
多擊朱此風俗士猶或非憐君頭半白其志竟不衰我亦君之徒鬱鬱何所  
為不能發聲哭轉作樂府詩篇篇無空文句句必盡規切過虞人

箴痛甚騷人詞非求宮律高不務文字奇惟歌生民病願得天子  
知未得天子知甘受時人嗤藥良氣味苦瑟淡音聲希不懼權豪  
怒亦任親朋譏人竟無奈何呼作狂男兒每逢羣動息或遇雲霧  
披但自高聲歌庶幾天聽卑歌哭雖異名所感則同歸寄君三十  
章與君爲哭詞

華下

司空圖

日炙旱雲裂迸爲千道血天地沸一鑊竟自烹妖孽竟湯過災數  
災數還中輟何事奸與邪古來難撲滅

傷時二首

孟雲卿

徘徊宋郊上不見平生親獨立正傷心悲風來孟津大方載群物  
生死有常倫虎豹不相食哀哉人食人豈知逢世運天道亮云云  
太虛流素月三五何皎明光曜侵白日賢愚迷至精四時更變化  
天道有虧盈常恐今已沒須臾復更生

封丘作

高適

我本漁樵孟諸野一生自是悠悠者乍可狂歌草澤中寧堪作吏  
風塵下祇言小邑無所爲公門百事皆有期拜迎官長心欲碎鞭  
撻黎庶令人悲悲來向家問妻子本家盡道今如此生事應須南  
畝田世情付與東流水夢想舊山安在哉爲銜君命且遲迴乃知  
梅福徒爲爾卻憶陶潛歸去來

街西居三首

姚合

受得山野性任成多事違青山在宅南迴首東西睇淺淺一井泉  
數家共汲之獨我惡水濁鑿井庭之陞自鑿還自飲亦爲衆所非  
吁嗟世間事繫身誠難爲

日出窮巷喜溫然勝重衣重衣豈不暖暖氣人不齊兀兀復行行  
不離階與堦

丈夫非馬蹄安得知路岐窮賤歿如薄興與養性宜乃知長生術  
豪貴難得之

效陳拾遺子昂

司空圖



醜婦競簪花花多映愈醜鄰女恃其姿掇之不盈手量已苟自私  
招損乃誰咎寵祿旣非安於吾竟何有

感時

好鳥無惡聲仁獸肯狂噬寧教鸚鵡啞不遣麒麟細人人語與默  
唯觀利與勢愛毀亦自遭掩謗終失計

夜坐

張說

懷哉四壁時未有五都價百金誰見許斗酒難爲貫落花生芳春  
孤月皎清夜復逢利交客題戶遙相謝

無可奈何歌

白居易

無可奈何兮白日走而朱顏頹少日往兮老日催生者不住兮死  
者不迴况乎寵辱豐頹之外物又何嘗不一去而一來去不可挽  
兮來不可推無可奈何兮已焉哉惟天長而地久前無始兮後無  
終嗟吾生之幾何寄瞬息乎其中又如太倉之稗米委一粒於萬  
鍾何不與道逍遙委化從容縱心放志洩洩融融胡爲乎分愛惡

於生死繫憂喜於窮通倔強其骨髓齟齬其心曾合冰炭以交戰  
祇自苦乎厥躬彼造物者于何不爲此與化者云何不隨或煦或  
吹或盛或衰雖千變與萬化委一順以貫之爲彼何非爲此何是  
誰冥此心夢蝶之子何禍非福何吉非凶誰達此觀喪馬之翁俾  
吾爲秋毫之杪吾亦自足不見其小俾吾爲泰山之阿吾亦無餘  
不見其多是以達人靜則昭然與陰合迹動則浩然與陽同波委  
順而已孰知其他時耶命耶吾其無奈彼何委邪順邪彼亦無奈  
吾何夫兩無可奈何然後能冥至順而合大和故吾所以飲大和  
扣至順而爲無可奈何之歌

逢白公

元稹

遠路事無限相逢唯一言月色照榮辱長安千萬門

感懷

費冠卿

螢燭不爲苦求名始辛酸上國無交親請謁多少難九月風割面  
羞汗成冰片求名俟公道名與公道遠力盡得一名他喜我且輕

家書十年絕歸去知誰榮馬嘶渭河柳特地起愁聲

贈崔純亮

孟郊

食齋腸亦苦強歌聲無歡出門即有礙誰謂天地寬有礙非遐方  
長安大道傍小人智慮險平地生太行鏡破不改光蘭死不改香  
始知君子交久久道益彰君心與我懷離別俱惘惶譬如浸蘗泉  
流苦日已長忍泣目易衰忍憂形易傷項籍豈非壯賈生豈非良  
當其失意時涕泗各滿裳古人勸加食此食難自強一飯九祝噎  
一嗟十斷腸况非兒女冤冤氣凌彼蒼彼蒼若有知白日下清霜  
今朝始驚呼碧落空茫茫

客喜

賈島

客喜非實喜客悲非實悲百迴信到家未當身一歸未歸長愁嗟  
愁嗟填中懷開口吐愁聲還卻入耳來嘗恐滴淚多自損兩目輝  
鬢邊雖有絲不堪織寒衣

有所思

宋之問

洛陽城東桃李花飛來飛去落誰家幽閨兒女惜顏色坐見落花  
長歎息今年花落顏色改明年花開復誰在已見松柏摧爲薪更  
聞桑田變成海古人無復洛城東今人還對落花風年年歲歲花  
相似歲歲年年人不同寄言全盛紅顏子須憐半死白頭翁此翁  
白頭真可憐伊昔紅顏美少年公子王孫芳樹下清歌妙舞落花  
前光祿池臺文錦繡將軍樓閣畫神仙一朝卧病無相識三春行  
樂在誰邊婉轉蛾眉能幾時須臾鶴髮亂如絲但看古來歌舞地  
唯有黃昏鳥雀飛

秦人謠

古之奇

微生祖龍代卻思堯舜道何人仕帝庭拔殺指佞草姦臣弄民柄  
天子恣衷抱上下一相蒙馬鹿遂顛倒中國旣版蕩骨肉安可保  
人生貴年壽吾恨死不早

時興

楊賁

貴人昔未貴咸願顧寒微及自登樞要何曾問布衣平明登紫閣

日晏下彤闈擾擾路傍子無勞歌是非

聞碓有感

呂溫

千門儼雲端此地富羅紈秋月三五夜碓聲滿長安幽人感中懷  
靜聽淚泂瀾所恨搗衣者不知天下寒

野田行

于鵠

日沒出古城野田何茫茫寒狐上孤冢鬼火燒白楊昔人未爲泉  
下客若到此中還斷腸

贈馮宿

李觀

寒晨上秦原遊子衣飄飄黑雲截萬里獵火從中燒陰空蒸長煙  
殺氣獨不銷冰交石可裂風疾山如搖時無青松心顧我獨不凋

偶然作二首

呂溫

棲樓復汲汲忽覺年四十今朝滿衣淚不是傷春泣  
中夜兀然坐無言空涕淚丈夫志氣事兒女安得知

及第後答潼關主人

本欲雲雨化却隨波浪翻一露太常第十過潼關門志力且虛棄  
功名誰復論主人固相問慙笑不能言

朝飢

賈島

市中有樵山此舍朝無煙井底有甘泉釜中乃空然我要見白日  
雪來塞青天立聞西牀琴凍折兩三弦飢莫詣他門古人有拙言

九日詵顧少府

高適

簷前白日應可惜籬下黃花爲誰有客子迎霜未授衣主人得錢  
肯酤酒蘇秦憔悴時多厭蔡澤棲遲世看醜縱使登高祗斷腸不  
如獨坐空搔首

觀玉篇 并序

陳子昂

丙戌歲余從左補闕喬公北征夏四月軍幕舍于張掖河河洲草  
木無他異者唯有仙人杖往往叢生幽朔地寒與中國頗異余家  
世好服食昔嘗餌之及此役也而息意茲味戍人有薦嘉蔬者此  
物存焉余倏爾而笑曰始者與此君別不圖至是而見之豈非神

明嘉惠將欲扶吾壽也。因爲喬公昌言其能。時東萊王仲烈亦同旅舍聞而大喜。甘心食之。已旬有五日矣。適有行人自謂知藥者。謂喬公曰：「此白棘也。公何謬哉？」仲烈愕然而疑。亦曰：「吾怪其味甜。今果如此。」喬公信是言。乃譏余作采玉篇。謂宋人不識玉而寶珉石也。余心知必是由以獨見之故。被奪於衆人。乃喟然而嘆曰：「嗟乎！人之大明者目也。心之至信者口也。夫目照五色。口分五味。玄黃甘苦亦可斷而不惑矣。而路傍一議二子。增疑况君臣之間。朋友之際乎！自是而觀之。則萬物之情可見也。感采玉詠而作觀玉篇。以荅之。并示仲烈。譏其失真。」

鴟夷雙白玉。此玉有縞磷懸之。千金價。舉世莫知。具丹青非異色。輕重有殊。倫勿信。王工言徒悲荆國人。

素絲

陸龜蒙

園客麗獨繭。詩人吟五綬。如何墨子淚。反以悲途窮。我意豈於是。願參天地功。爲綫補君袞。爲絃繫君桐。左右修闕職。宮商還古風。

端然潔白心可與神明通

李都尉古劍

白居易

古劍寒黯黯鑄來幾千秋白光納日月紫氣排斗牛有客借一觀  
愛之不敢求湛然玉匣中秋水澄不流至寶有本性精剛無與儔  
可使寸寸折不能繞指柔願快直士心將斷佞臣頭不願報小怨  
夜半刺私讎勸君慎所用無作神兵羞

廢琴

絲桐合爲琴中有太古聲古聲淡無味不稱今人情玉徽光彩滅  
朱弦塵土生廢棄來已久遺音尚泠泠不辭爲君彈縱彈人不聽  
何物使之然羌笛與秦箏

廢瑟詞

張籍

古瑟在匣誰復識玉柱顛倒朱絲黑千年曲譜不分明樂府無人  
傳正聲秋蟲暗穿塵作色腹中不辨工人名幾時天下復古樂此  
瑟還奏雲門曲



說劍

元稹

吾友有寶劍密之如密友我寶膠漆交中堂共杯酒酒酣肝膽露  
恨不眼前剖高唱荆卿歌亂擊相如缶更擊復更唱更酌亦更壽  
白虹座上飛青蛇匣中吼我聞音響異疑是干將偶爲君再拜言  
神物可見不君言亦可見復言我自取迎匣已焚香近鞘先澤手  
徐抽寸寸刃漸屈彎彎肘殺殺霜在鋒團團月臨鈕逡巡潛虬躍  
鬱律驚左右霆雷滿室光蛟龍繞身走我爲捧之泣此劍別來久  
鑄時堇山破藏在松桂朽幽匣獄邊埋神人水心守本用稽泥淬  
果非雷煥有我欲評劍功願君良聽受劍可剗犀兕劍可切瓊玖  
劍決天外雲劍衝日中斗劍墮妖蛇腹劍拂佞臣首太古初斷鼇  
武王親擊紂燕丹卷地圖陳平縮花綬曾被桂樹枝寒光射林莽  
曾經鑄農器利用翦稂莠神物終變化復爲龍牝牡晉末武庫燒  
脫然排戶牖爲欲掃羣胡散作彌天帚自茲失所往豪英共爲詬  
今復誰人鑄挺然千載後旣非古風胡無乃近鷗九自我與君遊

平生益自負况擎寶劍出重以雄心扣此劍何太奇此心何太厚  
觀君慎所用所用無或苟潛將辟魑魅勿但防妾婦留斬泓下蛟  
莫試街中狗君今困泥滓我亦空塵垢俗耳驚大言逢人少開口

春桂問荅二首

王績

問春桂桃李正芬華年光隨處滿何事獨無花  
春桂荅春華詎能久風霜搖落時獨秀君知不

養鷲詞

并序

劉禹錫

途逢少年志在逐絕句方呼鷹隼以襲飛走因縱觀之卒無所獲行  
人有嘗從事於斯者曰夫鷲禽飢則爲用今哺之過篤故然也予  
感之作養鷲詞

養鷲非玩形所資擊鮮力少年昧其理日日哺不息探鷲網黃口  
旦暮有餘食寧知下韝時翅重飛不得陪鯁止林表狡兔自南北  
飲啄既已盈安能勞羽翼

對菊

賈島

九日不出門十日見黃菊灼灼尚繁英美人無消息

直釣吟

盧仝

初歲學釣魚自謂魚易得三十持釣竿一魚釣不得人釣曲我釣直哀哉我釣又無食文王已沒不復生直釣之道何時行

競渡

元稹

吾觀競舟子因測大競源天地昔將競蓬敦書夜昏龍蛇相噴薄  
海岱俱崩奔群動皆攪撓化作流渾渾數極關心息大和承混元  
一氣忽為二轟然畫乾坤日月復照曜春秋遞寒溫八荒坦以曠  
萬物羅亦繁聖人中間立理世了煩延縣縣復幾歲逮及義與軒  
炎皇熾如炭蚩尤扇其燔有能競心起驅戰山林樊一戰波委焰  
再戰火燎原戰訖天下定號之為軒轅自是豈無競瑣細不復言  
其次有龍競競渡龍之門龍門浚如瀉宗射不可援赤鱗化時至  
搪突鬣鬣掀乘風瞥然去萬里黃河翻接瞬電烜出微吟霹靂喧  
傍瞻曠宇宙俯瞰卑崐嶠庶類咸在下九霄行易捫倏辭蛙黽穴

遽排天帝闈迴悲暴鯁者未免鯨鯢吞帝命澤諸夏不棄蟲與昆  
隨時布膏露稱物施厚恩草木霑我潤豚魚望我蕃嚮來同競輩  
豈料由我存壯哉龍競渡一競身獨尊捨此皆蟻鬪競舟何足論

冬日見牧牛人擔青草歸

張說

塞上縣應折江南草可結欲持梅嶺花遠競榆關雪日月無他照  
山川何頓別苟齊兩地心問天將安設

道州觀野火

呂溫

南風吹烈焰灼灼燒楚澤陽景當晝連陰天半夜赤過處若彗掃  
來時如電激豈復辨蕭蘭焉得分玉石蟲蛇盡爍爛虎兕亦奔迫  
積穢一蕩除和氣始融液堯時旣敬授禹稼斯肇迹遍生合穎禾  
大秀兩歧麥家有京坻詠人無溝壑感若悟焚如功來歲終受益

諭寶二首

元稹

沉玉在弱泥泥弱玉易沉扶桑寒日薄不照萬丈心安得潛淵虬  
拔壑超鄧林泥封泰山陞水散旱天霖洗此泥下玉照曜臺殿深

刻爲傳國寶神器人不侵

水置白玉壺始見清皎絜珠穿殷紅縷始見明洞澈鑊鐻無人淬  
兩刃幽壤鐵春鏡無人拭一片埋霧月驥跼環堵中骨附筋入節  
虯蟠尺澤內魚貫蛙同穴鯨鯢無巨海浮桴矜濊滴棟梁無廣廈  
顛倒卧霜雪大鵬無長空舉翮受羈縲豫章無厚地危柢真飢餓  
圭璧無卞和甘與頑石列舜禹無陶堯名隨腐草滅神功伏神物  
神物神乃別人神不世出所以神功絕神物豈徒然用之有施設  
禹功九州理舜德天下悅璧充傳國璽圭用祈泰折千尋豫章幹  
九萬大鵬歇棟梁庇生民餘艘濟來哲虯騰旱天雨驥騁流電掣  
鏡懸姦膽露劒拂妖蛇裂珠生照乘光冰瑩環座熱此物比在泥  
斯言爲誰發凡今盡凡耳不爲君不說

送春曲三首

劉禹錫

春向晚春晚思悠哉風雲日已故花葉自相摧漠漠空中去何時  
天際來

春已暮萼萼如人老映葉見殘花連天是青草可憐桃與李從此  
同桑棗

春竟去此去何時迴遊人千萬恨落日高臺寂寞繁華盡流鶯  
歸不來

衡州早春二首

呂溫

碧水何逶迤東風吹沙草煙波千里曲不辨嵩陽道  
病肺不飲酒傷心不看花唯驚望鄉處猶自隔長沙

尋人偶題

邵真

日晏不復午落花難歸樹人生能幾何莫厭相逢遇

題花樹

楊衡

都無看花意偶到樹邊來可憐枝上色一一爲愁開

惜花

陸龜蒙

人壽期滿百花開唯一春其間風雨至旦夕旋爲塵若使花解愁  
愁於看花人

秋日

耿緯

返照入閭巷憂來與誰語  
古道無人行秋風動禾黍

秋夕懷遠

孟郊

卧冷無遠夢聽秋酸  
別情高枝低枝風千葉  
萬葉聲淺井不供飲  
瘦田長廢耕今交非古交  
貧語聞皆輕

蟋蟀詩

羅隱

頑颯斃芳吹愁夕長眉成有動  
歌離弔夢如訴如言緒引虛寬  
周隙伺榻繁咽貢緣范睡蟬老冠  
峨綏好不冠不綏爾奚以悲蚊蚋  
有毒食人肌肉蒼蠅多端黑白偷  
安爾也出處物兮莫累壤含啼  
衰虛堂泣署勿徇諠譁鼠豈無牙  
勿學萋菲垣亦有耳危條槁飛  
抽恨咿咿別帳釭冷柔魂不定  
美人在何夜影流波與子佇立  
徘徊思多

秋思

司空圖

身病時亦危逢秋多慟哭  
風波一搖蕩天地幾翻覆  
孤螢出荒池

落葉穿破屋勢利長草草何人訪幽獨

在郡秋懷二首

張九齡

秋風入前林蕭颺鳴寒枝寂寞遊子思寤歎何人知宦成名不立  
志在歲已馳五十而無聞古人深所疵平生去外飾直道如不羈  
未得操割效忽復寒暑移物情有固然身退毀亦隨悠悠滄江渚  
望望白雲涯露下霜且降澤中草披離蘭艾若不分安用馨香爲  
庭蕪生白露歲候感遐心策蹇慙遠塗巢枝思故林小人恐致寇  
終日如臨深魚鳥好自逸池籠安所欽挂冠東都門採蕨南山岑  
議道誠愧昔覽分還愜今憮然憂成老空爾白頭吟

重校正唐文粹卷第十八





重校正唐文粹卷第十九之上

吳興姚

鉉

纂

頌甲 魏六首

盛德大業

無疆頌 李華

起義堂頌 僧一行又云張說

開元正曆握乾符頌 張說

上黨舊宮述聖頌

龍池聖德頌 張九齡

靈武受命官頌 楊炎

無疆頌 并序

李華

臣華言伏以漢明帝時徼外蠻夷槃木白狼獻詩歌德屬事史官  
况臣自曾祖至臣備國家職負臣又逮事玄宗肅宗今以餘年獲  
事陛下官歷御史補闕尚書郎命薄多病不獲奔赴闕庭恐先朝  
露同於泥塵若無歌詩頌德曾蠻夷不若也敢述列聖爲無疆頌  
式昭皇家大慶無窮謹昧死稽首以聞

高祖元頌

昊昊旻天

監於下

興有德

維隋之杪

時黷陰凝

陽潛未登

人思照矣

雷行龍興

盪濯雰慝

文明乎萬國

垂仁蒸人

載親天監

保我子孫

魏魏皇皇

後之皇

丕承之

太宗烈頌

高祖受天命

誕興太宗

成天之命

帝賜以逾

黎人毒痛

甚焚于爐

甚溺于塗

以樂以呼

呼天無辜

高祖謂太宗

爾必有天下

爾其訂談

太宗稽首

恭受天命

臣請滌除

張我師

撫征四國

翦雜羣慝

鼓一方

三方震驚

默昭其靈

隨顧而平

我負我乳

我安我成

以奉君父

以臨天下

任忠孝文武

建禮章樂舞

我雖明德

諫則納汝

時惟帝降佑之

自古明后

莫如我德

我勛唐無疆

天子之無疆

本太宗休命

高宗康頌

肇爲址爲堂

實勒實勛

付俾厥裔

丕承后

帝思不忘

神棐靜康

不耀而光

不求而昌

自中方

外達夷羌

瞻我大邦

助祭在于廟

執貢朝于王

油油時雲

雨厥百穀

溇溇景風

扇彼嘉穀

飴口飽腹

以厭以足

俾壽而福

都阜成天人

中宗興頌

屏蠱之毒

豐而爲蠹

謀虐天之族

天祐聖祚

八柱將覆

帝告五臣

保翼朕躬

赫赫彤彤

日升雲中

百臣受命

鉞爾頑兇

故曰再造我天下

生人鼓舞

旣成矣

又奉父母

睿宗德頌

后戚之禍再興

有危兢兢

廟桃震怒

陰命聖子

翼登聖父

奮其神旅

宵杖金斧

殄殲逆亂

大聖照臨

元元宅心

歸祚于有功有德

於戲盛德

玄宗文頌

丕鑠玄宗之明

克孝克仁

允武允文

宣祖宗之光

垂于子孫

盛禮畢舉

大樂畢陳

百蠻來賓

元元阜殷

戎或不賓

遣師徂征

罔不頓顙

踏于雷霆

在漢方昌

用刑慘酷

中都繫考

六萬餘人

使者案錄

誅千萬人

其後賢王

光武赫赫

誅沛賓客

以千以百

孝明稱賢

楚獄連年

坐死逮捕

以萬以千

猶曰漢祚宜長

越我祖宗

不忍用刑

至于玄宗

哀彼鈇鑕

降爲鞭撻

誕告郡國

大爲屋室

醫彼百疾

追懷登遐

止害禽畜

旁爲陂池

養鱗介族

既濡既渥

昆蟲草木

享國五十年

寓縣晏然

逆臣犯天

天念蒸人

若曰寧我負恥

不忍人戰死

乃告元子

理兵朝鄙

西幸蜀都

命元子受圖

天下既定

父堯子舜

歸于國都

無不欣愉

無不涕濡

傳聖自順

升靈太微

嗚呼上聖

之道之純

不可度思

肅宗孝頌

穆穆孝慈

有如肅宗之誠

達于神祇

爰訓六師

震登北陸

陵陵雷馳

西戎南蠻

北狄東夷

咸舉其旂

佐皇之威

帝心如天

無噬無慾

颺然丘岳

破裂崖谷

逆隸傾覆

朝社大復

屆于海之外服

以盥以濯

以舞以躍

帝在東宮

孝如文王

蒸蒸其心

天地知其孝

既收鎬洛

祀于陵朝

奉迎上聖

天日並照

有兇有孽

將噬將齧

我旂方設

則已顛蹶

如燿於雪

尊嚴而仁

仁覆而嚴

大臣小臣

莫不潔廉

躬勤百度

百度如其素

今上照頌

大邦之興

維天相之

曷興曷相

有德繼王

昔殷王

盤庚武丁

紹登殷明

矧我帝君

丕承天命

疊引其慶

生我皇聖

幼冲聖敬

寔左右肅宗

開國御戎

羣師稟教

舉則成功

自西自東

如霆如風

蕩滌元兇

罔不率從

既登大位

於變時雍

人咸曰

上如太宗

延億兆斯年

地博天崇

罔不爾容

玄宗元孫

爲玄宗烈文

肅宗元子

承肅宗孝理

起義堂頌 并序

僧一行 又云張說

堯以天下禪舜舜以天下禪禹禹將宅百揆揔萬國一讓于稷禹

再讓于臯繇稷卨先舉彼商與周以之更盛臯繇後天我國家於  
茲受命非舜以考天而疇咨審靈命之陰隲非禹以享天而德讓  
知歷數之有歸及乎玄元間出光大前慶垂道德而統運依清虛  
而立法天祚我李厥惟舊哉并州起義堂者皇天造帝之初高祖  
誓衆之地也隋氏失御國亂無家小道自賢大才胥忌惟宮室陂  
池之好惟沈湎暴慢是保上帝不歆黎人咸戚六軍踰海而東敗  
萬乘過江而南覆豺狼入邑狹狷爭人黔首囂然方將無訴我高  
祖感之乃龍躍晉水鳳翔太原百神前驅萬姓來奔開咸陽入天  
門用湯武之兵靜新室之亂遵唐虞之典承太王之基率百官受  
終于文祖輯五玉班瑞于諸侯類圓裡方之禮備封功爵德之議  
允約法惟簡代虐以寬子惠困窮懷柔蠻貊金石一變日月重華  
近古以來未有革命易姓若此之盛者也非天私我有唐惟天祐  
于積德非唐求人庶惟人懷于累仁當此之時太宗內啓聖謀  
外行專斷躬擐甲胄跋履山川駕英雄而爲奧主一區域而定大



業周詩曰昊天有成命二后受之信今之謂也若夫脩德以降命奉命以造邦源濬者流長根深者葉茂天人報應豈相遠哉觀周之興始於后稷公劉承以大王王季皆勤儉忠厚克廣前烈至于文王成之武王啓之康王安之故卜世三卜年八百天所命也我唐之興也始於皐繇玄元承以景皇元帝皆立言邁德垂裕後昆至於高祖受之太宗有之高宗守之中宗復舊業睿宗新景命比之周室我何謝焉且如陳德明刑庶其躬稼之績玄宗道要小其避狄之仁化流率土狹其江漢之域義寧大朝蓋其牧野之戰故武德中太行出大聲曰唐興理萬年蓋天之所命年代未可涯也仲尼曰惟天爲大惟堯則之又曰韶盡美矣又盡善也非至德其孰能如此其大者乎於戲先后捨元子而立子主鬯煩大位而付予天下自高祖創業百有六戰欽承丕緒十有四載東西南北無思不服山川鬼神亦莫不寧實惟藝祖儲福之所致豈予幼孫菲德之能及方將運心于玄妙之境勵志于造化之爐發令爲祥

符施惠爲霖雨任賢爲兩曜仗能爲四時俾溥天之下有形者遂  
全懷生者自足樹鋪野繭田種嘉穀斷雕爲樸捐珠棄王追大庭  
而齊風夢華胥而同俗非曰能爾願憑宗祐而效焉癸亥之歲獻  
春正月濟河橫汾省方展義存問黎老緬慕本邦城郭歸然桑梓  
如舊覽風物之憂思尋王業之艱難惟高祖若天地之開闢化成  
萬類惟太宗若日月之照臨光于四表舉晉陽之甲除君側之盜  
由唐侯之封升天子之號肇基發迹實在於茲仙駕無所或顧懷  
于舊土靈魄無方儻來歸于北堂郡縣之所宜嚴奉前人有言曰  
禮不忘本樂保其德如姬誅周原而劉歌沛邑思我烈祖如聞歎  
息之音嗟爾後人無忘成功之頌頌曰

皇矣上帝臨下有赫降監四海求人之瘼吁彼隋煬其政不獲眷  
我高祖此惟其宅天輔臯繇明刑弼教道尊老氏同玄體妙仁表  
四乳明融獨照隨父託心史良辨貌高祖誕靈神光夜耀天妹作  
合日兄夢紹祚生文帝膺運會昌首唱高祖鸞飛晉陽萬夫一心

元戎啓行火旗炎炎雲鳥洋洋五星迓帝萬國謳唐天網恢疎王  
師節制威惟連戮老生摧斃山祗引軍河龍渡帝渭倉散積離宮  
弛閉關輔來蘇遠方咸惠長安宮室上法太微隋遷寶鼎唐在璿  
璣仗入雙闕詔出九圍三靈協載百祿同歸帝謂太宗表正封略  
濤蕩颺掃霆馳電爍劍不摧鋒弩無再彊西平汧隴東取河洛杲  
密德充頭懸面縛北走獯鬻南達蠻荆遠碣作乂梁岐底平風動  
神行海隅蒼生莫不來庭於昭義堂誓衆資始天命所起于胥頌  
美維予小子夙夜敬止於戲皇王緒思不忘

開元正曆握乾符頌

并序

張說

客有嘲臣曰聖主正新曆握乾符百僚摩歌以美時六合鼓舞以  
頌德先生獨宴默書閣含翰詞林奚其爲僂儷也臣應之曰斗水  
不能評巨壑之量隙光未足議大明之體何者見褊而守隘也握  
乾符者不謂執天命歟執天命者非夫廣德休曆交相表裏況命  
者夫子之所罕言也焉可偏贊而揔握符之盛哉如作者略大本

舉小節不亦仲尼之門所聽瑩也是以涸思乾慮久難其述客無  
異焉客曰請終餘論粵若我大唐慶始白雲道昇紫氣屬漢東失  
馭淮南不返高祖舉晉陽之甲戡定關西太宗因後后之師削平  
天下高宗收圖海外檢玉封中九域黎人重代飲澤雖鳴鸞改號  
神龍中興周鼎歸唐玄圭祀夏中宗違代孽孽窺國於是斗聖上  
起藩邸入鈞陳一麾水心羣兇泥首崇復大聖越踐少陽受禪當  
寧而光大前烈垂統拜璧而慎寧後嗣四海有覆盂之安百代無  
委裘之隙是之謂聖人握符之大寶也四星入輔五將出禦倚禮  
樂爲國計仗仁義爲軍勢英賢集殿而文教成于戚舞階而武功  
振敬讓光于九族孝慈行於萬宇磧嶂西南渤瀚東北熾皮火毳  
曠炎山污熱海向風來王黑貂駮駿浮天溟絕冰漠連歲獻款鳥  
獸無猜人之意草木無不達之氣升中于天比天同貴是之謂聖  
人握符之大政也歷試上黨黃龍飛天入清中禁白虹指日瘞汾  
睢寶鼎見柴岱宗卿雲蔚非應事而呈瑞者雖多狎而不紀矣是

之謂聖人握符之大祥也以數推氣以氣定朔以星殷時以閏成  
歲考星間而革踈度置歲差而辨誤日立大衍之紀參大渾之晷  
合鍾律之聲極鬼神之情是之謂聖人握符之大曆也若夫仁聖  
根於內菁華發於外祥兆秘於前謠讖灼於後自然之理也彼洛  
下閎者漢太初時一巧曆耳其云後八百歲當差一日有聖人正  
之斯人也抑將露才揚術預證來聖有耆舊之傳記無史策之明  
文然至隋之開皇及麟德聖歷三家創法一引爲徵約之年代則  
隣近稽之圖籙則曖昧未有如新曆之昭昭者矣昔在唐虞之際  
以斗精受命者七神得四均間氣而生者又二十八人所謂三十  
五際者也禹以金德王故夏后之有天下也生數四百年契以水  
德王故殷人之有天下也成數六百年稷以木德王故周人之有  
天下也成數八百年伯益之命中天而堯族以火德乘之故漢室  
之有天下也生數再及二百年其間距王而興不能復大禹九州  
之跡及勝殘百年之命者皆五神之餘氣也臯繇降德皇唐復興

土精應王厚德載物生數五百成數千年命曆有歸此其大較修德增祚與天無窮轉筭之徒莫能究也緯以入元三百四歲爲德運七百六十歲爲代軌千五百二十歲爲天地出符四千五百六十歲爲七精返初天人相應合若符節自堯典命羲和修重黎之舊理顓頊之曆上元甲子千五百餘歲得孔聖而春秋之曆序暨開元十二年甲子凡三千四十歲遇聖上而大衍之曆興是時也土德入生數之元天命當出符之會信矣伏惟聖上聰明文思道德之具也豁達大度皇帝之體也藝摠六經漢光之學也文通三變魏祖之才也緣情定制五禮之本也洞音度曲六樂之宗也神於弧矢黃軒之威也聖於翰墨蒼頡之妙也兄弟善友王季之心也子孫衆多周文之福也大寶以定天位大政以布廣德大祥以合靈符大曆以啓成命德位兼才臨照如此符命介福粲彰如彼所謂廣德休曆交相表裏之效也善曆者必推來運以自神興王者不俟往言以表聖設徵夫洛下閔之語也其不有容成之事乎

且如恃有命比於日孰是夏王之福也賴卜年衰其德豈謂周公之訓也故曰王者執天命在於俟天符致天符在於順天德布天德在於保天位四者備矣然後陳其盛德告於神明捨此道也胡可語正天曆握乾符哉謏臣惜學謝生玄造樂虞典之歌舜羨周詩之美文敢不敷信辭薦清樂獻上客之課託衆篇之後云爾

維皇六葉於赫啓聖步玉斗握金鏡地維續天柱正山川授方雷雨施令清廟九祐堯門百慶郊稷尊祖擇昌定命德自我流藝從我修龜易八卦龍書九疇文舍王律字吐銀鈎鳴絲鶴舞調箭援愁集賢榜殿花萼名樓神用外表事行先兆萬目朝徹千心暗曉卿雲爛熳黃龍窈窕遊姑射神人宵登太山天下小飛祥定瑞均靈躋類鞮譯窮天琛維盡地燦此金戟鑄爲農器匪直也然探玄索秘軸止輪運辰居星轉得一神凝吹萬情辨發欽潛合晦明幽闡階瑩朝開宮槐夜卷正我長曆同符大衍天地清焉日月貞焉四時行焉萬物生焉窮神知化美功成焉金版玉牒遠頌聲焉

上黨舊宮述聖頌

并序

維開元十有一祀正月皇帝展義于河東挾右太行留宴上黨整  
兵耀武入于太原設都建頌以崇王業南轅汾睢祈穀后土天清  
日朗神歆如荅三月庚午飲至長安六軍解嚴四方和會邇觀法  
象遐誅德澤大虞巡之典修美漢祠之禮舉人心翕而一變神物  
效而無方於是邠王臣守禮寧王臣憲申王臣撝岐王臣範薛王  
臣業獻書於內開府儀同三司臣璟尚書臣晁臣象先臣頌御史  
大夫臣漼抗疏於外僉曰陛下受天曆數稽聖典謨道貫三靈仁  
育萬類掃陰沴而覩日開闢之功也尊文考而御天帝王之孝也  
天以陛下爲子人奉陛下爲君萬殊之福斯應畢臻三代之風頌  
聲咸作今潞人懷代邸誅泗亭採聖崖延立石將表潛龍之館勒  
啓聖之圖勤亦至矣陛下推而不報其何以下塞衆望上對神休  
哉臣聞天之所啓人之忻戴必憑睿聖玄懿之德元命真符之紀  
功業見乎變德施加乎時德厚者施溥功玄者應速或階晦以彰



或由難而昌蓋生其德之謂天授其時之謂命天有成命其可没乎陛下昔居是州也紫雲在天神光照室白鹿來擾黃龍上昇隴出仙洞而神魚躍山開禪穴而靈鍾韻謠言合讖巨迹引途嘉李傍連祥著自起當此時也金石預變獄訟先歸政殷六府人重五教陶無窳器漁有讓泉神而化之人不知力昔龍負圖而大舜登狼銜鈎而后殷昌玄珪錫於夏禹赤伏歸於漢光應運協符希代稱寶未有窮祥極瑞傲儻瓌異如今之至者矣若玄既集而不彰則神心不悅鴻業成而不贊則祝告無聞是掩天休而蓋聖德也臣子之罪將何解焉願聽潞人以揚丕烈帝曰往者中宗違代國步微艱天祚我唐大命集于睿宗大聖真皇帝朕畏天將命不敢怠違其乾符坤珍皆先聖之餘福朕何力之有焉然重違昆弟公卿之請抑以敬從無爲虛美重朕不德也羣臣遊聖蕩莫能名約乎舊史敢頌成績辭曰

帝德廣運乃聖乃神天祚聖兮唐惟舊邦其命惟新再受命兮帝

初正人降居上黨天下往兮黃龍晝見攀天而上九五象兮帝適  
于野紫雲之下求必在兮帝寢于堂變龍有光觀者駭兮天迹童  
謠木連著立摠神異兮空鍾化穴縞鹿赤魚何詭異兮上天無聲  
託類附形覺悟人兮聖皇齋栗在得戒失昭事神兮幡幡潞老樂  
我王道愛舊宮兮赫赫頌功與天比崇據無窮兮

龍池聖德頌并序

張九齡

臣聞昔者玄德升聞皇天眷命元聖有作上帝何言而必見意於  
休徵忘象於幽贊惟茲降鑒若曰專精道周萬物者其魄尤功濟  
生人者其祥大粵若古始肇有君臣巢燧之前寂寥無紀書契之  
後炳煥可觀若乃鬼神睢盱品彙紛錯性命未正吉凶不定而太  
昊氏將通其德則河爲之出圖人食未粒鳥獸是茹時不耕稼器  
無耒耜而神農氏將教其本則天爲之雨粟蚩尤不道炎帝不制  
銅鐵鑄兵材狼橫厲而軒轅氏將禁其暴則天爲之降玄女洪水  
方割下民昏墊堯德莫能弭厥災舜功不能除其害而夏后氏將

理其績則洛爲之出書自茲已降蓋三千歲矣其閒木火更王雲  
物告符有若狼銜鈎魚躍舟素靈出黃星見豈不以湯德有慙武  
善未盡漢道旣雜魏方亦偏唯以一至之應且爲興王之兆則未  
有天錫真符聖受休命遠與大禹相續超與上皇比崇如我國家  
之盛者焉惟龍池蓋天之所以祚聖即今上卜居之舊里京師爽  
塏之地傍無寶澤中忽濫泉非常而靈液涓流無幾而神化浸廣  
榮光休氣若烟若雲所未曾有則此之出雖清可以鑑而深不見  
底鱗介瑰詭充滿其中時莫知其所然日徒見其有異中宗採識  
者之議壓王氣而來遊聖上處或躍之時出飛龍而合應臨淄始  
封也邸第在焉上黨歷試也靈符紹至天其以是永命我唐國家  
丁寧有所底止其若茲也夫數有時而否至理也無代而亡固存  
乎大聖之生也乘運而作鼓天下之動安天下之危故禪順成功  
自古之啓佑之也如彼克定多難自天之叶贊之也如此初中宗  
違代后黨日窺隙大道狃於得志羣慝起而擅朝若綴旒然當

此時也天與若不取鬼謀若不協則我祖宗之業無乃將墜而億兆之命亦猶倒懸聖上感之提劍而起雷霆一奮妖沴以清內難既衰外虞有謚推戴太上照臨萬邦實天之爲與人更始系皇統維乾綱決綻補壞蕩瑕滌穢而乃闕典咸備舊章悉舉處窮盡達在困必通品物資以再生寰區爲之一變然後反華僞於朴還澆醜於醇以大道爲源以至仁爲根動推是心以御於事人見德而興行神享誠而介福故不任於刑罰亦不在於禱請大造化成玄猷充塞有如陽春播澤觸類皆滋泰山起雲無遠不徧雖昆蟲草木與蠻貊要荒樂其所生安其所習在牛羊而勿踐有干戈而載戢又況於衣冠華夏禮樂邦家而不形於斯須不彰於漸漬者也夫然何教非德何化非經何能事之不舉何醇精之未極周溥洋溢成乎緝熙至於太和莫不允若體包天地之大事出皇王之表豈擎跽曲拳盡禮極力將用彥聖不啻其口所能稱誦於吾君所可殆庶於至德且往者之有開也天感精以降聖聖敬命以奉天

此誠有元則欽明文思及茲報本必嚴祇齋粟靈慶以屬之神化以荅之與初相明其微乃著紛綸先兆非篤信歟由是言之統天者人合符者聖而美德序命殊尤卓絕豈多乎哉至于占之興王必有所感五帝更尚五運傍通土者黃中之精於金爲母水者善利之物於土爲妃苟應期而有來必合德而爲表是則然矣天其或者亦阜育羣化發揮蕃祉始告以聖有明徵終成乎帝之神冊因其立象之本會以相乘之數則載祀六百歷紀千年變而通之胡可量也宗子宗正卿褒信郡王璨若干人伯父伯兄仲叔季弟聚族相與詣闕上言天意昭著固已久矣人事符合亦云至矣而一德是建太階旣平靈臺靈沼赫赫明明天之爲大雖莫能名王之在鎬豈無頌聲上初克讓抑而未許至於累請乃曰俞哉史臣不敏敢獻頌曰

茫茫元昊載凝載溥在帝庖羲繼天而作浩浩洪水包山襄陵舜亦命禹夏氏以興龍圖龜書二主是膺湯武已下夫何足徵右元命

於燦巨唐乘運而起續禹之統系堯之紀五聖在天丕命曾孫高  
視河洛同符混元亦有黃龍出於靈沼明明穆穆天子之表右聖德  
倬彼東井昭章于天沈精降液下爲靈泉泉靈有泚有深無底泌  
之洋洋其甘如醴清德之鑑柔道之體洪源濬規實天所啓右泉龍  
濯濯靈泉洞冥皇祇滋液流行化爲神池曰止曰行惟聖之作匪  
鱸匪鮪惟龍之躍植物斯生動物斯樂天根有見曾是不涸右神池  
靈有休氣紛紛郁郁如山之苞如雲之族潛龍在下瞻烏在屋兆  
云其吉周爰咨詢旣契我龜又叶我人鎬雖舊京其命惟新右休氣  
蜿蜿黃龍神池自出靈化惚恍噴雲沃日告帝之符其儀孔佶或  
潛于泉或見在田與時順動亦應于天克酬我皇無得稱焉

靈武受命宮頌

并序

楊炎

臣聞享天降命惟德也哉難奉時惟聖也必有非常之運是興撥  
亂之功君以蒼生爲憂不以濡足爲患以寧濟爲業不以修身爲  
道此陶唐所以捨而不畏舜禹所以受而不疑靈武官皇帝躍龍

之所日者奸臣竊命四海蕩波我聖皇天帝探命曆之數啓龍圖  
作受命之書付于我皇帝皇帝方遊崆峒以求至道於是羣公卿  
士負玉旒金璽望氣芒碭之野三進於閭闔之中曰臣聞在昔蚩  
尤連禍大盜中國神農氏兵莫能勝天降玄女勅軒轅氏大定其  
災厥後堯有九州之害而命禹禹以四海之功而受舜陛下主鬯  
大位十有九年精爽者皆美德馨乾坤也必聞幽贊玄德上達景  
福有歸六聖觀命曆之期兆人有臨難之請陛下畏災運而不處  
棄黎元而不顧以至仁爲薄以大寶爲輕臣等若不克所請與億  
兆之衆將被髮拊膺號於天而訴於帝矣皇帝唯然改容曰豈人  
心歟丁卯廣平王倣太尉尤弼司徒子儀尚書左僕射冕兵部尚  
書輔國與北軍將士西上耆老萬五千人排闥以訴帝曰今豺狼  
穴居宮闕陛下兆庶爲餌宗廟爲墟若臣等誠懇未通是高祖不  
歆於太廟且陛下涉渭則洪流涸迴鑿則慶雲見布澤而川池廣  
勤道而嘉禾生靈祗髣髴玄貺幽感臣聞符命待聖而作天運否

終而會歲蕤昫蠻會也睿武英明聖也臣等敢昧死上聞帝乃灑  
齋宮啓金匱鳴咽拜受詔有司大赦天下改元曰至德元年尊聖  
父爲文武太皇帝是日烟雲變作士庶踴躍黃龍見於東郊紫氣  
滿於天門翌日也數百里衣裳會兼旬也數千里朝貢會踰月也  
天下兵車會決時也四方戎狄會以一旅成百萬之師率胡夷平  
社稷之難禮郊祀戴聖皇與人合誠心以氣消天癘動罔不吉歆  
無不報是以白鹿擾於王庭靈芝產於延英化動而功成淵默而  
頌聲言禪代者陋蒼梧易姓之名語嗣守者羞唐堯積善之辱述  
戡定者歎四紀而復夏美中興者蚩三六而滅新於戲神祇之所  
歸往品物之所法象鼓飛龍於尺水仗大義而東向矢謨發号實  
在茲都願篆石宮庭以垂萬古俾過山澤知風雨之奧窮造化識  
天地之鑪臣炎稽首敢獻頌曰

赫赫河圖啓天之祐雲從億萬皇在九五惟昔陶唐克傳舜禹漢  
也武也夫何足數彼妖者勃惟暴惟貪天寶即命人將不堪皇曰



內禪于再于三盡武之善去湯之慝兵車百萬洵洵雷震橫會九州爲行爲陣恃力者踣從命者順孝以奉天神而撫運至德唐堯崇功大禹皤皤北叟垂白而覩沛邑空歌周原已古徘徊頌聲永介茲土

重校正唐文粹卷第十九之上

重校正唐文粹卷第十九之下

吳興姚

鉉

纂

頌乙摠三首

封禪

紀泰山銘

附 玄宗御製

大唐封禪頌

張說

大唐封東嶽朝覲壇頌

蘇頌

紀泰山銘

附

玄宗御製

朕宅帝位十有四載顧惟不德情於至道任夫難任安夫難安茲朕未知獲戾於上下心之浩蕩若涉於大川賴上帝垂休先后儲慶宰衡庶尹交修皇極四海會同五典敷暢歲云再熟人用大和百辟僉謀唱予封禪謂孝莫大於嚴父謂禮莫尊於告天天符既至人望其積固請不已固辭不獲予與夫二三臣稽虞典繹漢制

張皇六師震疊九寓旌旅有列士馬無譁肅肅邕邕翼翼溶溶以至于岱宗頂也爾雅云泰山爲東岳周官曰兗州之鎮山實惟天

帝之孫羣靈之府其方處萬物之始故稱岱焉其位居五岳之伯故稱宗焉曰昔者受命易姓於是乎啓天地薦成功序圖錄紀氏號朕承先王茲率厥典實欲報玄天之眷命爲蒼生之祈福豈敢高視萬古自比九皇哉故設壇場於山下受羣方之助祭躬封燎於山上巽一獻之通神斯亦因高崇天就廣增地之義也乃仲冬庚寅有事東岳類于昊天上帝配我高祖在天之神罔不畢降粵翌日禪於社首侑我聖考祀於皇祇在地之神罔不咸舉暨壬辰覲羣后上公進曰天子膺天符納介福羣臣拜手稽首稱千萬歲慶荅歡同陳誠以德大渾叶度彝倫攸叙三事百揆時乃之功萬物由庚兆人允植列牧衆宰時乃之功一二兄弟篤以孝友錫類萬國時惟休哉我儒制禮我史作樂天地擾順時惟休哉蠻夷戎狄重譯來貢累聖之化朕何慕焉五靈百寶日來月集會昌之運朕何感焉凡今而後儆乃在位一王度齊衆法權舊章補缺政存簡易去煩苛思立人極乃見天則於戲天生蒸人惟后時又能以

美利利天下事天明矣坤厚載物惟后時相能以厚生生萬人事地察矣天地明察鬼神著矣惟我藝祖文考精爽在天其曰懿予幼孫克享上帝時若馨香其丕乃曰會我之文武曾孫其誕錫新命續我舊業永保天祿子孫其承之予小子敢對揚上帝之休命則亦與百執事尚綏兆人將多于前功而越彼後患一夫不獲萬方其罪予一心有終上天其知我朕惟寶行三德曰慈儉謙慈者覆無疆之言儉者崇將來之訓自滿者人損自謙者天益苟如是則軌迹易循基構易守磨石壁刻金記後之人聽詞而見心觀末而知本銘曰

惟天生人立君以理惟君受命奉爲天子代去不留人來無已德涼者滅道高斯起赫赫高祖明明太宗爰革隋政奄有萬邦罄天張宇盡地開封武稱有截文表時邕高宗稽古德施周溥茫茫九夷削平一鼓禮備封禪功齊舜禹巖巖岱宗衍我玄神中宗紹運舊邦惟新睿宗繼明天下歸仁恭已南面綱緼化醇告成之禮留

諸後人緬予小子重基五聖匪功伐高匪德矜盛欽若祀典丕承  
永命至誠動天福我萬姓古封泰山七十二君或禪社首或禪云  
云其迹不見其名可聞祇適文祖光照舊勳方士虛誕儒書齷齪  
佚后求仙誣神檢玉秦災風雨漢汗編錄德未合天或承之辱道  
在觀政名非從欲銘心絕巖播告羣岳

大唐封禪頌

張說

皇唐六葉開元神武皇帝再受命致太平乃封岱宗禪社首鑿石  
紀號天文煥發儒臣志美立碣祠壇曰厥初生人俶有君臣其道  
茫昧其風朴略因時而歛起與運而紛落泯泯沒沒無聞焉爾後  
代聖人取法象立名位衣裳以等之甲兵以怛之於是禮樂出而  
書記存矣反其源致敬乎天地報其本致美乎鬼神則封禪者帝  
王受天命告成功之爲也閱曩聖之奧訓考列辟之通術疇若天  
而不成曷背道而靡失由此推之封禪之義有三帝王之略有七  
七者何傳不云道德仁義禮智信乎順之稱聖哲逆之号狂悖三

者一位當五行圖錄之序二時會四海昇平之運三德具欽明文  
思之美是謂與天合符名不死矣有一不足而云封禪人且未許  
其如天何言舊史者君莫道於陶唐虞舜臣莫德於臯陶稷高三  
臣降德皆有天下仲尼叙帝王之書繫周秦之誓明魯祀周公用  
王禮秦承伯益接周統孔聖微旨不其歎然秦定天下之功高  
享天祿之日淺天而未忘庭堅之德也故大命復集于皇家天之  
贊唐不惟舊矣其興之也玄靈啓迪黃祇顧懷應歸運以義舉撫  
來蘇以利見護也無放夏之慙武也無伐殷之戰高祖創業四宗  
重光德有格天漏泉蒸雲濡露菌蠢滋育氤氳涵煦若天地之覆  
載日月之照臨溥有形而歸景罄無外而宅心百有八年于茲矣  
皇帝攘內難而啓新命戴睿宗而繼舊服宇宙更闢朝廷始位蓋  
羲軒氏之造皇圖也九族敦序百姓昭明萬邦咸和黎人於變立  
土圭以步曆革銅渾以正天蓋唐虞氏之張帝道也天地四時六  
官著禮井田三壤五圻成賦廣九廟以尊祖定六律以和神蓋三

代之設王制也武緯之文經之聖暮之神化之然猶戰戰兢兢日  
慎一日納規誨以進德遂忠良以代工講習乎無爲之書討論乎  
集賢之殿寵勇爵貴經明翼乎鶴鷺之列在庭毅乎貔豹之師居  
鄙人和旁感神寶沓至乾符坤珍千品萬類超圖溢牒未始聞記  
我后以人瑞爲心不以物瑞爲意王公卿士儼然進曰休哉陛下  
孝至于天政合乎道前年祈后土人獲大穰間歲祀圓丘日不奄  
朔感祥以祈聖因事以觀天天文交合其則不遠意者喬丘埽路  
望翠華之來上帝儲恩俟蒼壁之禮义矣焉可專讓而廢舊勛羣  
臣固言勤帝知罪至于再至于三帝乃挹之曰欽崇天道俯率嘉  
話恐德不類敢憚于勤其撰巡狩之儀求封禪之故旣而禮官不  
戒而備軍政不謀而輯大姥練日雨師灑道六甲按隊八陣警蹕  
孟冬仲旬乘輿乃出千旗雲引萬戟林行霍溼燐爛飛焰揚精原  
野爲之震動草木爲之風生歷郡縣省謠俗問百年舉百祀興墜  
典葺闕政攸徂之人室家相慶萬方縱觀千里如堵城邑連歡丘

陵聚舞其中垂白之老樂過以泣不啻蒿里之魂復見乾封之事  
堯雲往舜日還神華靈鬱爛慢乎穹壤之間是月來至于岱祗祓  
齋宮滌濯靜室凝神玄覽將款太一議夫泰山者聖帝受天官之  
宮天孫摠人靈之府自昔立國莫知萬數克升中而建號惟七十  
而有五我高宗六之而今七矣非夫尊位盛時明德曠代遼闊難  
并之甚哉先時將臻夫大封也累封疆於高岡築泰壇於陽趾夫  
其天壇三襲辰陞十二咸秩衆靈列坐有次崇牙樹羽管磬鋪鼓  
宮懸於重壇之內干戚釵鈎戟戣戣周位於四門之外伐國重  
器傳代絕瑞旅之於中庭玉輦金轂翠冒黃屋夾之於端路庶官  
百辟羗夷蠻貊褒成之後讓王之容序立於禮神之場髦頭弩牙  
鐵馬金鏃介冑如雪旗幟如火遠而於清禁之野於是乎以天正  
上元法駕徐進屯千乘於平路留羣臣於谷口皇帝御六龍陟萬  
仞獨與一二元老執事之人出天門臨日觀次沆瀣宿巉巖赤霄  
可接白雲在下庚寅祀高祖於上封以配上帝命衆官於下位以



享衆神皇帝冕裘登壇奠獻俯僂叶金奏佾羽舞撞黃鐘歌大呂  
開闔闔與天語清將信公奉斗布度懋建皇極勤恤蒼生昭嘏乎  
未兆攘災乎未萌上下傳節而禮成樂遍福壽同歸而帝賜神策  
乃檢玉牒於中項揚柴燎於高天庶忠誠之上達若憑焰而駕煙  
日轡方旋神心餘眷五色雲起拂馬以隨人萬歲山呼從天而至  
地越翌日尊睿宗侑地祇而禮社首遂張大樂觀東后國風惟舊  
無黜幽削爵之誅王澤惟新有眚災大賚之慶不浹日至化洽於  
人心不崇朝景福遍於天下然後藏金匱於柘室迴玉鸞於上都  
煌煌乎真聖朝之能事而高代之盛節者也于斯之時華戎殊俗  
異音同歎曰兵合多雨山峻多雲豈有大舉百萬之師剋期千里  
之外及行事之日則天無點翳地無纖塵嚴冬變爲韶景寒風鬱  
爲和氣非至德其孰能動天如此其順者乎昔人云自西自東自  
南自北無思不服今信知聖人作而萬物覩其心服之之謂矣或  
曰祭泰析主先后非禮歟曰是禮也非宜也王者父事天母事地

侑神崇孝無嫌可也且夫柴瘞外事帝王主之蒸嘗內事后妃助之是開元正人倫革弊禮起百王之法也故令千載職末光聆絕韻咀甘實漱芳潤爍玄妙之至精流不已之淑聲臣說作頌告于神明四皇墳而六帝典雖吉甫亦莫能名徒採彼輿人之詩曰大矣哉維天爲大惟皇則之率我萬國受天之祺子孫百代人神共保綏之云爾而已矣

大唐封東嶽朝覲頌并序

蘇頌

封祀之山五在中國泰嶽首之昊穹之命再集巨唐皇帝受之臨位十四年考虞氏歲巡之義諷周王時邁之什十月辛酉步自有洛十一月景戌帳殿齋於岳趾淵默以清繹思而照將紀功布度順斗承天精享也已丑宏觀軼區宇盛儀振開闢高臨建鳳萬隊張皇以燭山上御飛龍百神翕習以扶道國台二藩后四髦士密侍信臣高位扈封臺列升陞不下五十以聖言冲邈瑤牒寶書誓之旨曰朕獲守丕業恐不克駿命惟上帝儲休錫蒼生無疆之慶

朕之慶也古則秘之何哉屬寒馳迅颺露清終夕若掃若鋤晏然而已庚寅天官次錄王制協時嚴高祖以配之嗣高宗以陟之冕裘立珪璧序潔蠱俎調鍾呂倨勾於篋簾曼擊平祝敵寶駢瑞兮物焜煌空薄霄兮音容與則織塵不動和氣充塞日在於觀天爲之門揚日大光謂小天下昭以抱戴見之卿霑郁郁紛紛喜氣烟煜當芝檢引紫熏太紫洞而三辰接鬱蒼搖而萬歲聞自下達上儀吾君君之來兮望如雲端兮睟聖之門至尊辛卯有事于社首以泰折如泰壇於穆我睿宗侑而作主真獻嗚咽天子之孝也僉以金匱歸勛於祖禰石礪藏美於乾坤戒咸秩則司存癸巳載大旂合大樂三陔崛以惟抗四亞鏘而輅止朝羣牧揆千官底邦賦數庭實華蟲辨等車馬來觀周人隨人二王之賓戎狄蠻貊萬里重譯必拱干著執贄奉璋顛顛昂昂靡敢怠違乃建雞竿伐鼉鼓帝命出皇恩溥揚巽風作解雨施舍之蕩滌之宥法罪除頗類頊湯洋溢周流騁爵不崇朝而遍者與此山俱嶙嶭而不拔胡微而

不鋪也亦既稱壽申命宗伯咨爾頌焉效古之刻石臣頌稽首再拜而言曰

臣聞昔在帝堯臣惟咎繇聰明之謂聖邁種之謂德天若曰依于巨唐易姓者李王於中華崇功者唐聖之澤德之浸也我唐祚之興昌符誕膺兩儀動六葉承皇帝宣高祖四宗之景烈肇開元神武之明號廣矣大矣莫有不寧罔有不俾咸一德之輔不二心之臣羣后抗詞曰臣聞先王因天事天因地事地因名山升中于天陛下得天之經得地之義得人之行行也者孝莫大焉兼三才以爲政政也者仁莫大焉令萬物以爲性今三才貞萬物亨六典平九功成官不滔獄不放至于刑清良有以也因斯而談清明在躬志氣如神之睿者君也四國于藩四方于宣之美者臣也有物有則我君臣保乂之原所由於前設其教於後余往歲邦危中否天討內難陛下提三尺之劍狎閭闔絕勾陳趨北軍正北辰然後翼翼乾乾尊尊親親立我蒸人聖考所以付天下之公器蹈汾陽之

清塵唐雖舊邦其命惟新古者振兵釋旅祠土祈穀先事也我是以幸太原祭汾睢耀金甲肅邊鄙虜馬驚而不敢南向解嚴京師獲寶鼎獻宗廟戎人歸而盡務東作報福京坻於是乎爰佐五時郊天以奉時爰崇九室禘祖而敬思昭格遲遲神人允釐無何籍三脊盛六穗不召斯至擁休之類如山則委曷月而秘豈非享物降嘉司火也立渾同度在璿也陛下姑謂之薄臣所未諭且管氏詫齊帝王凡八十九湮淪鬱沒孰若致美我高宗勒岱甲子正六十盼蠻蕞蕤故能應期我神武惟繼代奉業增高保鴻缺乎中何也即先后以權蹙阻于運二宗紹復未遑厥功神闇之契不在諸子而當聖躬固不可辭者審矣帝曰俞畏德之不稱而左輔右弼雜擢紳鴻碩之倫抱藹懷書蒸雲吐霧方集賢內殿講議前席以論之傳不云乎君子勤禮敬之至也易不云乎先王作樂豫以動也慎矣哉禮樂之爲用故執禮者具刪弊則質宜之自我變樂者理去商何害謙以爲臣二者洽而三讓之制曰可始嚴鹵簿騰七

萃啓禁關迴九重以聽乎鸞聲之雍雍匪疾匪徐物有其容動植  
讚華夷觀駢闐總擗羨漫半散出成臯踰榮波滙滑臺眺洪河遂  
並昆吾之墟倘佯乎大舜之澤瀕四瀆二濟入于究徑九一三齊  
喬於岱推二旬有六而頓行在莫不皤皤華皓如藿傾陽或牽以  
籩或捧之觴偃僂乎康莊一以伸神武之今日一以感乾封之舊  
章迺籩歸之觴舉之慈且惠而與之驩沸渭頡頏矧國鄒魯家洙  
泗乘汶野而圖記可知指泮林而頌聲不墜以周公之故將孔子  
之後翹然希王者之屬車聖人之清蹕則父及信宿之應巖巖所  
瞻宗神曰天齊王加一等於三事戶二十供王祀環十里禁人樵  
報也大禋旅之數重褒成之祿撫遺吐賜之復帝曰吁夫艱難繫  
王業休咎牽人事況天監之殊祥也殊典也不自滿而虔鞏于位  
朕寶臣曰乾曜洎說有初有終時乃風欽哉汝作朕左右丞相繫  
汝忠益以嘉猷補袞之闕罔或怠遂弘天封煥天章篆介丘而旋  
德陽大饗乎羣方後代美其律聲其實墳作四而籍言七也臣

類不敏繼伯夷之直清微太史之留滯聆金奏同百獸之舞振木  
鐸採萬人之詩敢陳詩以頌曰

天子聖兮天孫崇登以封兮報以功受命再惟皇代天之賚人所  
載士馬山嶸戈矛山沓禎符山雜靈響山荅天與人合我鋪衍兮  
長粹清太元冊兮太一精休光光我之慶成舜四朝而禹萬國莫  
之我京

重校正唐文粹卷第十九之下

重校正唐文粹卷第二十

吳興姚

鉉

纂

頌丙

雅附摠入并

神武四

大唐中興頌

元結

鳳翔出師紀聖功頌楊炎

大唐河西平胡頌

平淮西雅

宗元

時政一

聖政紀頌

來鵠

豐年一

德勝頌歐陽詹

祥應一

歲星居心頌

權德輿

高世一

伯夷頌

韓愈



大唐中興頌并序

元結

天寶十四年安祿山陷洛陽明年陷長安天子幸蜀太子即位於靈武明年皇帝移軍鳳翔其年復兩京上皇還京師於戲前代帝王有盛德大業者必見于歌頌若令歌頌大業刻之金石非老於文學其誰宜爲頌曰

噫嘻前朝孽臣姦驕爲昏爲妖邊將騁兵毒亂國經羣生失寧大駕南巡百僚竄身奉賊稱臣天將昌唐繫睨我皇匹馬北方獨立一呼千麾萬旛戎卒前驅我師其東儲皇撫戎蕩攘羣兇復服指期曾不踰時有國無之事有至難宗廟再安二聖重歡地闢天開蠲除妖災瑞慶大來克徒逆儔涵濡天休死生堪羞功勞位尊忠烈名存澤流子孫盛德之興山高日昇萬福是膺能令大君聲容云云不在斯文湘江東西中直浯溪石崖天齊可磨可鐫刊此頌焉何千萬年

鳳翔出師紀聖功頌并序

楊炎

舜有兩階之舞周有孟津之會皇帝有岐陽之蒐德莫勤乎安國  
勛莫配乎立極利萬物莫近乎去暴蓋受天元符與人請命冥契  
相合億兆有歸以唱則感神鬼之心以征則去雲雷之難維唐七  
葉姦臣大盜於二京皇帝龍鳴於河北觀兵雍上建都發號以朝  
萬國心嚮天地志通幽昧淳精四達大造玄成於是巢山駕海之  
羣狼燾鳥章之君不期而趨于闕下者四十有三萬元帥廣平王  
倣太尉光弼司徒子儀等稽首言曰臣聞天啓聖以俟時聖感時  
而赴難非神功不能當大運非玄德不能合人心故軒轅之道也  
伏蚩尤宗周之仁也稱襁負陛下之德大瑞於人和人和而動天  
天與和合氣百姓因之以獨化四夷因之以子來王師德之以貞  
勝意者河洛俟怨後東征之期人靈駿奔望西符之禮天子方齊  
寶輅講金匱之書翌日霓旌武賁大車之輪黃鉞靈鼉彤弓太阿  
荆韓楚魏之廣七閩五獠之長金鼓百萬車徒九合大陣于東郊  
皇帝建白麾以誓于軍曰維高祖歆于上天四宗重光照臨下土

百有五十祀至于聖皇揔武之干戈備文之法象最爾逆虜敢迷  
天紀盜我符璽黷我威靈使四海之內兵革縱橫肝腦塗裂旻蒼  
降鑒錫命於予俾續夏已墜之功寬堯未刑之族於戲余匪王帛  
山河是愛惟蒼生災害是憂匪天命威力是憑惟人心忠義是保  
咨爾張目成天羅植髮成干櫓布和成將帥厲氣成風雲若作進  
退爾惟旗鼓若斷首尾爾惟常蛇若戮鯨鯢爾惟干將若拯沈溺  
爾惟巨艦夏有一旅之衆武有十人之暮志定金石信非盟誓爾  
其念哉是時天威動六合兵氣連太白乾坤爲之坼軋河嶽爲之  
震蕩彼狐鳴孽齒之徒不崇朝而聲反於謳歌形歸於蹈舞者幾  
過半矣故鄆杜之師以形勝灞上之兒以威逐桃林之陣以奇破  
河洛之孽以氣摧帝乃開天牢迴豹尾陵顛氣鎖攬搶應龍秉鉞  
玄女侍坐乃考夏氏配天之義備漢皇建武之典雲髦王輅山動  
地踊降自西雍幸于京師萬姓前導百靈爲衛布德澤望陵寢悲  
黍稷之將秀覽城闕之爲墟以雷雨洗川澤以皇風清怨怒以大

賞議勤勞以成功告宗廟以詳明去龔昧以惠政哀困窮清蹕而奉聖皇稱觴以朝前殿於是東國耆老長安士庶排御輅入天庭動千門呼萬歲煙雲下遶林藪山迴神靈頌於堂精鬼感於廟王侯慶於國父子洽於家鍾石反於懸壘俎陳於席華戎踴躍喜氣磅礴日非三舍天聲萬里神謀不得窺其奧天道不能後其時斯一會之略也然後動變化爲鑪假仁義爲途陶氣象鑿耳目與神合同契以道浸澆醜全犀象之形斷珠王之脛然後以景星燭夜甘露清氣昇閭風對天老捨鴻名以還太素乘大曆而統人紀俾不思而降不祭而歆以元和感生淳古於是宰臣聚而言曰主上以神武清難至德遂人崇勳絕瑞光照萬古闢開日月于今六年百姓豈忘力於帝乎人臣盍謝生於天乎請相與鑿石於誓師之場告成於得衆之地斯王道之盛典臣炎稽首敢獻頌曰

天命帝兮蕩妖昏交風雨兮會秦門惟聖德兮漫海外五單于兮勇士會俗鳥獸兮家雲鳥越浮山泛青草徵羽騎兮列天營啓金

滕兮賜長纓日爲車兮雷爲鼓醢鯨鯢兮掃煙雨開明堂兮饗文  
祖帝爲皇兮后爲母歌雲臺兮冊王府篆穹石兮駕終古

大唐河西平胡聖德頌

并序

維唐至德二年春正月武威郡胡泊九蕃夷落內伺師旅之間外  
合狼豕之克據金城害州伯蛇變交戟之下炎焚大澤之中二月  
乙丑皇帝以五命之服詔太僕崔倂摠中權專上將誓軍前之士  
郤城下之盟又命內常侍劉日新振鼓鐸之音護羌戎之長林竦  
蝟合會于東郊粵庚午高牙大旆鐵馬長轍歎以清笳陣以雲蛇  
列于四衝蓬頭執戟鼓以靈鼉進于達路趨悍獷狻虎裘蟻臂北  
陵于土門之隙鈎車雲梯强弩堅楯齊傳于西烽之亭於是引熊  
虎之師杖龍蛇之劍矛戟四起煙塵火色金鼓一振天地徘徊血  
亂玄黃聲囂羗屋是風雲皆入陣彼草木盡爲兵日月垂照於窮  
鄉皇靈赫臨於天外名王貴馬大王文貝素女錦衣百金之產萬  
井之資皆委于入貢之府布于有地之官是時也千人踊萬人賀

美太階之符見頌偃伯之議興持進金城太守李萬頃洎五邑長  
吏軍正大夫等言曰蓋聞王命先天以奉時賢臣合統以偕運靡  
乘乎帝籙不能撥亂罔應乎閒氣不得遭逢故大人之作必先靖  
難以摧兇取暴爲治國以任賢杖能爲建功磅礴乎茅茨之下葺  
藜乎玄古之上斯軒轅得之以勝蚩尤大夏得之以勝有扈西伯  
得之去殷伐崇太宗得之奄有遼海上皇得之克平巨猾陛下得  
之再清宇宙掃蕩氛孽允若大唐之新命復高祖之天下臣等恭  
惟六聖騰光百有五十祀周賁海寓鋪敷菌蠢丹穴之費孤竹之  
君金罍括羽委命下吏陛下建大號纘鴻業歸勛祖禰昭事聖皇  
是必天錫忠良佐成命器二臣所應皇運之統伏崇羽之兇太康  
西人永永來齋願篆石誌美以爲頌云

詔虎臣兮殪天狐載火旗兮耀昆吾霽塵壘兮被戎都

獻平淮西雅

并表

柳宗元

臣某言臣負罪竄伏違尚書牋表奏十有四年聖恩寬宥命守遐

壤懷印曳紱有社有人云云伏惟睿聖文武皇帝陛下天造神斷  
克清大憝金鼓一動萬方畢臣太平之功中興之德推校千古無  
所與讓臣伏自忖度有方剛之力不得備戎行致死命況今已無  
事思報國恩獨唯文章伏見周宣王時稱中興其道彰大于後罕  
及然徵於詩大小雅其選徒出狩則車攻吉日命官分土則崧高  
韓奕蒸人南征北伐則六月采芑平淮夷則江漢常武鏗錫炳耀  
盪人耳目故宣王之形容與其輔佐今由望之若神人然此無他  
以雅故也臣伏見陛下自即位已來平夏州夷劔南取江東定河  
北今又發自天衷克翦淮右而又大雅不作臣誠不佞然不勝憤  
踊伏以朝多文臣不敢盡累數事謹撰平淮夷雅二篇雖不及尹  
吉甫邵穆公等庶施後代有以佐唐之光明謹昧死再拜以獻平  
淮夷雅二篇

皇武

方城

皇武命丞相度董師集大功也

皇者音其武于澱于淮既徒既車環蔡其來狡衆昏囂甚毒于醒  
狂奔叫喚以扞大刑皇咨于度惟汝一德曠誅四祀其後汝克錫  
汝斧鉞其往視師師是蔡人以宥以釐度拜稽首廟于元龜既類  
既禡于社是宜金節煌煌錫鏞彫戈犀甲熊旆成命是荷度拜稽  
首出次于東天子餞之鬯尊是崇鼎臠俎馘五獻百籩凡百卿士  
班以周旋既涉于滙乃翼乃前孰啻厥猷其佐多賢宛宛周道于  
山于川遠揚邇昭陟降連連我旆我旗于道于陌訓于羣帥拳勇  
來格公曰徐之無恃額額式和爾容惟義之宅進次于郟彼昏卒  
狂妄兇鞠頑鋒蝟斧螳赤子匍匐厥父是元怒其萌芽以惇太陽  
王旅渾渾是佚是怙既獲敵帥若飢得餉蔡兇伊窘悉起來聚右  
擣其虛靡愆厥慮載闕載核承相是臨弛其武刑諭我德心其危  
既安有長如林曾是謹誆化爲謳吟皇曰來歸汝復相予爵之成  
國柝以夏墟度拜稽首天子聖神度拜稽首皇祐下人淮夷既平  
震是朔南宜廟宜郊以告德音歸牛休馬豐稼于野我武唯皇永



保無疆

皇武十有一章章八句

方城命朔守也卒入蔡得其大醜以平淮右

方城臨臨王卒峙之匪徼匪競皇有正命皇命于朔往舒余仁踣  
彼艱頑柔惠是馴愬拜即命于皇之訓既礪既攻以後厥刃王卒  
嶷嶷熊羆是式銜勇韜力日思奮殛寇昏以狂敢蹈愬疆士獲厥  
心大袒高驤長戟酋矛粲其綏章右翦左屠聿禽其良其良既宥  
告以父母恩柔于肌卒貢爾有維彼攸恃乃偵乃誘維彼攸宅乃  
發乃守其是爰獲我功我多陰謀厥圖以究爾訛雨雪洋洋大風  
來加于燠其寒于邇其遐汝陰之茫懸派之峨是拔是震大殲厥  
家狡虜既縻輸于國都示之市人即社行誅乃諭乃止蔡有厚喜  
完其室家仰父俯子汝水沄沄既清而瀾蔡人行歌我步逶遲蔡  
人歌矣祭風和矣孰類蔡初胡孰爾居式慕以康爲愿有餘是究  
是咨皇德既舒皇曰咨愬裕乃父功昔我文祖惟西平是庸內誨

于家外刑于邦孰是祭人而不率從蔡人率止惟西平有子惟我有臣疇允大邦俾惠我人于廟告功以顯萬方

方城十章章八句

聖政紀頌

并序

來鵠

穆宗皇帝臨大朝與羣臣言奏政事羣臣退而宰臣奏曰陛下問及乎政事此三皇五帝之所徵美也陛下不問及史臣此三皇五帝之所弭已也徵美者將有乎聞也弭已者將有乎亡也以聞之而又亡之則陛下徒有宵衣旰食之名規天條地之績與羣臣言後若颺然拂冠過冕湮時銷日無得用於後譬如十夫樹楊一夫拔之無得以成其大也政事羣臣得陛下日問之是十夫樹楊也史官執筆爲陛下日遠之是一夫拔楊也使後之人訝聖朝空晨虛夕閑殿曠廷無君臣咨謀洋溢之言乏社稷安危強謙之說是亦遠史臣致不載其事如拔去其楊將弭已之謂乎臣伏念貞觀永徽之代百官之有耳目但聽視天子而已故言事者安論紆

詞無疑權慮勢史官執筆于階之下天子側旒于殿之上奏者發誠于廷之中是以正衙一開則臣誠前而啓之帝旒近而鎮之史筆隨而絡之由是君臣謀國圖政之事俞機都要之言詭業發神豐編照物借籍于堯典差光于天陽至今見太宗文德若三皇五帝之所徵美也自永徽之後宰執不正窺伺是忌針棘前後阻越對駁狼噬虎食持膏銜肉蓋以言多爲已曾不致君內荏失中畏使人聽乃奏史官與百僚俱退然後宰臣請事由是君有問而宰臣知之史官不得與於聞君有舉而宰臣謀之史官不得記其事次第周行檢錄制誥與冗吏同工而已臣嘗涕泣以歎豈有以一已之細一性之忌於黍畷圭景之間苟嗜急須迴天遮上使聖緒神績有嘉歟善諷罔得聞於千萬年枉有謂明朝空晨虛夕閑殿曠廷無君臣咨謀洋溢之言乏社稷安危強讜之說若今踵而承之則不唯臣有障聰蔽睿之刺抑陛下雖有三皇五帝之所徵美而若遠史臣則三皇五帝之所弭已也抑又有一夫拔楊之謂殿

臣請史官執筆當羣臣奏事隨日撰錄號爲聖政紀臣立朝荷祿幸甚穆宗皇帝動辰頷旒憮然歎曰吁朕罔敢粉名厥後乃罔知厥後然聖人存簡策者亦非以粉名也蓋存乎大國之典鴻祖之業我國有典我祖有業業在于典典在于史曷厥史不書是尸余于祖涸業于典也朕纘承聖緒恭惟恪思將念厥政未嘗不離安廢酣馳荒鶩遠是以每與宰臣言如簇天下一巡省每見宰臣退而展天下盡聞知豈圖臣蓄猾謀公無同事欲弄尾舌先衛巖穴隔斥史臣占佞明后致懿搜嘉訪不存堯典之書善諷名猷莫出清廟之什史臣負我不舉其官宰輔盡忠厥聞有此由是詔史職執史筆立于廷之下錄君臣臚句之必行載剛毅進退之敢議題其篇目曰聖政紀也至上之即位三年有鄉校小臣來鵠居山澤間常私心重惜史臣以其史臣者是當國之鏡千億代之眉目也因窺穆宗實錄得解憤釋嫉於立史官爲聖政紀者追而頌出其事以鑒今之廷列故拜獻其頌曰

三皇不書五帝不紀有聖有神風銷日已何教何師生來死止無  
典無法頑肩冪比三皇實作五帝實治成天造地不昏不圯言得  
非排文得聖齒表表如見者莫若乎史是知朴繩休結正簡斯若  
君誥臣箴觚編毫絡前書後經規善鑒惡國之大章如何寢略嗚  
呼貞觀多叶末微多俞廷日發論殿日發謨牙孽不作鳥鼠其除  
論出不蓋謀行不紆極然史臣蛇然史褻瞠瞠而視透透而婁翹  
筆當面決防納污不枯爾智不席我愚執言直注史文直敷故得  
粲粲朝典落落廷謨聖牘旣多堯風不淺頰編坦軸君出臣顯若  
儼見旒若俯見冕無閑殿曠廷無尸安素晏三皇不亡五帝不翦  
太宗得之史焉斯展暨乎後相圖身天子專問我獨以言史不得  
近丘明見嫌倚相在擯秉筆如今隨班不進班退史歸惘然疇依  
奏問莫覩嘉謀固稀取彼誥命祿爲國肥炯哉時皇言必及章德  
室五帝道奧三皇如何翊臣嚙肉嗜益觜距磨快福衡物長控截  
僚位占護陽光垣私藩已遠史度唐俾德音嘉訪默縮暗亡咽典

禁法蓋聖籠昌曷以致此史文不張後必非笑將來否臧謂乎殿  
空宸逸朝惜廷荒不知姦蔽文失汪洋有貞觀業有永徽綱亦匿  
匪見亦寢匪彰賴有後臣知言不佞伊尹直心太甲須聖事既可  
書史何不命乃具前欺大陳不敬曰逐史之喻請以物並且十夫  
樹楊一夫欲競我既未牢拊豈能盛帝業以我逐史似拊穆宗憮  
然若夜若營何昔臣斯隱我祖正不傳親問不寫密諍孰示來朝  
以光神政由是天呼震爰徵奔召急史提筆來叱廷而入端耳抗  
目不撓不挹獬豸側頭螭蚪擺溼握管絕怡當殿而立君也盡問  
臣也倒誠磊磊其事鏗鏘其聲大何不顯細何不明語未絕緒史  
已錄成錄成謂何書政紀名伊紀清芬可昭典墳古師官鳥昔聖  
官雲方之我后錄里書分錄有君法書有君文君法君文在聖政  
紀云殿無閑時廷無曠日雲詠波訪倦編刊筆君勛臣勞上討下  
述惟勤惟明在聖政紀出至德何比至教焉如孰窺孰則外夷內  
儲謂君有道乎臣有謨歟有道有謨在聖政紀書一體列秩同力

翼戴祈福去枚絕防無礙國章可披唐文可愛善咨不偷嘉論不  
蓋不偷不蓋在聖政紀載諒夫揆斯不朽可懸魏闕愚得是言非  
訕非伐實謂鑿臣渾沌開君日月妖物霏死天文光發惟我之有  
頌兮奚斯躍而董狐覽

德勝頌二章并序

歐陽詹

唐貞元六年歲在庚午陰陽家流曰歲在午人馬食土人之所食  
也穀馬之所食也草今言食土明歲無嘉穀而野無青草則運數  
于茲合凶災之大者於是天尋舊步地轉恒軸交糾迴薄將有結  
于常沴自春二月至于夏五月或赫日杲杲或密雲溶溶爲焦灼  
爲霖霪似不日而至皇帝宿布大和人神鳥獸魚鱉咸若騰歡心  
揚喜雲欣欣熙熙休氣中積浹磅礴浮蒼蒼潛相憂磨力强者勝  
九陽搆旱而莫展六陰作潦而不就氛祲靄爲慶雲烈日者生氣  
光油油薰薰宛復如春塊不破而雨足條無聲而風暢日者生氣  
欲凝淑氣猶競彼雖罔得爲禍此亦未能爲福徘徊相持時澤不

降五稼含萌而待藝百芳蓄穎以思坵至是土膏融甘液宣若決  
亭泉如開涌煙豐本增歧芄芄縣縣無磽壅與良沃獲一十於百  
千賸疏雲蠹以委圃餘糧嶽峙而栖畝夫體病不能害心心平必  
能制體古人曰人者天地之心也既和且平則天地之病又焉得  
成歟况奔走游沫之物曰靈曰祇之類皆吁歛怡逸於其中乎宜  
其療乾元之宿疹愈坤元之常疾以至於交泰如斯之盛邪古先  
帝王至聖則堯至仁則湯有黎甿以稱理歷水旱而莫禦豈不以  
道未全洽而德尚涼哉皇帝非徒能禦之又易之爲大慶殊祥其  
於道德可謂充塞洋溢光今而邁古矣元元嗚啞歌聖代者動天  
殷地以夜繼晝而其詞未弘輒爲頌二章用貽於康衢庶事明而  
聲暢流乎無窮而以德勝目篇頌曰

歲在午天災于常昔人食土今我飫梁匪徒我飫梁鰥寡千箱盛  
矣乎吾皇之德變青爲祥休哉德兮

歲在午天災斯屬昔馬食土今牛饜菽匪徒牛饜菽犬豕梁肉盛



矣乎吾皇之德轉禍爲福休哉德兮

歲星居心頌

權德輿

皇上宅位六祀七政貞明於上七教敷聞於下其有不迪不吉不庭不若之徒皆薰然而和晻然而化春三月司天氏奏歲星居心宿五度其色黃明潤大光澤帝位積五十餘日詔下有司頒示中外故臣得而言之以形歌頌謹案歲星五帝爲蒼五行爲木五常爲仁五事爲貌天意若日時以至仁爲理覆露萬民洽決生類協夫五行五事之用則發於星緯形於禎應陰陽大化昭報成功玄符幽贊其昭昭如是禮運之論聖人以日星爲紀四時爲柄洪範之叙皇極曰斂時五福用敷錫厥庶人發於人格於天天人交感合若符節其年秋平河中之寇葬其遺骸復其世祀班淮右之師用弘文告用去武備此二帝三代所以恢令名也於是一統類以昭德明法制以塞違薦禮百神賓懷獷俗嘉瑞美祥紛委狎至置之而不有哲人端士連茹播職求之如已失然後端拱於穆清怡

神於靖冥驅一代爲純誠接萬靈於明庭斯又登邁遂古光昭聞見巍乎紹天統物之盛者也微臣瑣賤沐浴仁聖敢獻歲星居心頌一章以備周詩由庚由儀之闕頌曰

皇矣上帝降鑒下人后王承之制作禮文人用明德家尚孝仁人無癘疵俗以阜蕃敷祐四方發爲天祥重華煌煌乃居明堂下煦仁澤上爲祥光回復感通天人攸同乃法五事乃建大中君君臣臣德輝昭融保祐命之自天無窮微臣頌歌敢備唐風

伯夷頌并序

韓愈

士之持立獨行適於義而已不顧人之是非皆豪傑之士信道篤而自知明者也一家非之力行而不惑者鮮矣若至于一國一州非之力行而不惑者蓋天下一人而已矣若至於舉世非之而不惑者則千五百年乃一人而已耳若伯夷者窮天地亘萬世而不顧者也昭乎日月不足以爲明萃乎泰山不足以爲高巍乎天地不足以爲容當殷之亡周之興微子賢也抱祭器而去之武王周

公聖也率天下之賢士從天下之諸侯而攻之未嘗有非之者也  
彼伯夷叔齊乃獨以爲不可殷既滅矣天下宗周彼二子乃獨恥  
食其粟餓死而不顧由是而言夫豈有求而爲哉信道篤而自知  
明也今世之謂士者一凡人譽之則自以爲有餘一凡人沮之則  
自以爲不足夫彼獨非聖人自是如此夫聖人乃萬世之標準也  
余故曰若伯夷者特立獨行窮天地亘萬世而不顧者也雖然微  
二子亂臣賊子接跡于後世矣

重校正唐文粹卷第二十

嘉靖甲申歲太學生姑蘇徐熿文明刻于家塾